

四庫全書

集部

欽定四庫全書

集部

吳文正集卷九十八至一百

御史_臣邱文愷覆勘

武英殿纂修原任編修_臣吳裕德

欽定四庫全書

吳文正集卷九十八

元 吳澄 撰

韻語

七言古風

雪谷早行為張允中作

路絕人蹤失闕隘
槎枒老樹森矛介
兩間寥廓淨無塵
誰剪天花遍飛灑
風絮當頭零亂舞
茲遊浪說平生快
寒驚瘦骨真耐寒
踏破鴻蒙新色界
應不是奇模李常

侍夜發文城薄淮蔡又不是直諫韓侍郎遠謫潮陽出
秦塞面梨凍帖鬚掇銀何事催君早行邁君不見古昔
閉門僵卧人高似灞橋驢背償詩債

贈道士劉季榮

并序

白鶴觀道士劉季榮號清真師生平以能碁
遊四方諸名公莫不敬禮攜其所得贈言示
予就徵予作師既老且貧又無法嗣若有不
釋然者為賦長句以開解之時予移疾客劔

江寓清都觀

清真劉師八十一行脚一萬四千日鶴身七尺臞而長
鵲眼雙明黑如漆盛年狡獪稱善奕覆下百子無一失
貴人達官爭出迎鉅軸褒辭總名筆老來歸卧吳臯濱
密房春富飄餘芬吾師掩鼻自顧影齒牙半落舌空存
師曾一局春幾度底用厭厭怨遲暮算盡輸贏祇自誤
阿誰悟得碁中趣一枰白黑都收去試問虧成在何處
此碁不分三伯六十路只是中間路當其無處詳識

取

極高明亭

空中玲瓏八面窻虛境純白開天光山河幻影障不得
秋毫歷歷洞八荒大鵬凌摩九萬里九萬里下俱莽蒼
彼哉坐井窺管者鷗鷖夜撮搶榆枋向來東極產素王
嘗登泰嶽俯下方雙輪日月萬古照盲者不識庸何傷
人人具此上下四方眼請為拂拭聖孫心鏡三十有三
章

郭司令歸壽母

及親三釜亦云樂
違親千里寧不惡
養志雖分孺慕癡
愛日宜建春暉時
郭家弟兄好男兒
辭官歸來壽庭聞
慈顏歡笑引滿飲
幾年兒去今朝歸

題東坡古木圖

當年眉山孕三蘇
曾聞眉山草木枯
長公拈筆作仙戲
老木槎枒動春意
信知造化在公手
一轉豪端活枯朽
此木一春一秋一千年
與公雄文峭字永久同
流傳

次韻楊司業

春夏華榮變衰歇頽飈刮肌山露骨騷人望秋悲沓寥
忽見小春梅葢發頓然喜氣排寒冬不管天令嚴缺鉞
古來蹈道如蹈水與汨與齊偕出沒坐中白晝對羲皇
門外黃埃自城闕只憐郭璞註蟲魚或誤蔡謨啖蜚虺
爭似冥冥雲翼遠靜看滑滑霜蹄蹶公桑十畝通洙泗
我菊一區連楚越懸知真樂在曲肱到處扁舟堪散髮
我能振袂從公遊分我南溪半風月

題劉秘書贈劉德明字說後

劉仙校書天祿閣官情一似晴雲薄三載歸來鬚漆黑
高談空中響雷電楊子江邊槐柳濃散髮薰風小盤礴
笑傲月林清絕處憲戶重重啓闔鑰吾家先生此行寓
歸夢未須繞衡霍枕中鴻寶我秘書驚倒伊人得家學
贈言勗汝明德明三百明珠光錯落夜深持向月下讀
林外夔猶千里却不要青藜太乙燈自有萬丈流輝照
寥廓

題羅漢過海圖

阿誰解衣盤礴嬴作此中乘第一果等閑地獄駭屠沽
如許風波無不可巨境彌天靈怪百現前幻境元非我
騰踏逍遙容易去只有虛空無障褰般若岸金剛山超
登只在霎時間為吾說與諸尊者更有海門關外關

奉還師授小藁

張家弟兄真真難天才患多不患慳好詩一百三十首
高人擬刪不可刪聯篇累句採摘出矣止窺豹見一斑

丹霞皓月浸秋水青烟綠樹明春山神情飄飄已天外
蹤跡落落猶人間如何塵中著此客問駒吾欲叩九關
雪峯歌為傅繼先作

廬山幾千仞巒嶺上有五老仙人餐玉屑玉屑多多餐
不盡拋撒漫空舞霏雪幻成瀛海五神山不假白銀作
宮闕玉清真境無色界俯視人間俱蠓蟻三冬玄玄獨
皓皓掩蓋羣污同一潔從渠下土訝高寒美酒小兒夸
煖熱頗聞廬峯景萬變麗日融春秋霽月亦有烟霞雲

雨風唯有雪天最奇絕君不見西蜀雪山半年凝不化
豈識敏手神機弄詼譎又不見東維箕尾百世留餘光
來此偷取五老仙人餐玉訣雪中峯頂揖老仙呵手一
笑何年別

壽劉承旨

并序

唯齋先生年登八袞舊有江西吳澄寄詩為

壽

去歲公年七十九我共羣賢祝公壽今年公壽八十齊

我已還家在江右江右望公五千里坐憇音容如尺咫
我公歷遍翰苑官八袞堂堂老承旨公家壽域極天峻
彌仰彌高世增累公前我後許躋攀梯級已成因舊壘
公今具足五福疇我更期公百不憂蟠桃豈待三千歲
夜夢僊娥薦石榴

湖口阻風登江磯山觀濤

狂風吹入渾欲倒瑟瑟寒聲動秋草捫蘿徑上磯頭山
萬頃江湖波浩渺怒鱗雲鬣奔騰來眩目快心千樣好

向曾觀海難為觀回首匡廬青未了玄雲作帽深蒙頭
五老藏昂元不老何時月夜水鏡淨潏蕩澄虛納蒼昊
著我峯尖伴老人坐看海東紅日杲

輔夫人慶八十詩

任南夫人八十歲視明聽聰德溫惠子佐大梁丞相府
孫分千里諸侯寄聯翩采服梅風暄阿孫拜後子拜前
一時慶事實希有此慶流衍端有先任南公如朱絲絃
平反十九人不冤高門車馬固餘事福報泉湧來源源

宰屬瑚璉白玉堂州君蘭茁初春芳天然德器家之寶
未論品秩袍笏光太常序筆煥瓊玖翰林李家詩老手
盛事喧喧閭里傳傳之他日鄉青編我曾有堂號三樂
人羨人誇難強學如今回顧只潸然畢竟蹄豚盃酒祝
穰田多公一門母賢子賢孫又賢賢德所萃天所憐天
所憐慶綿綿年年此日開壽筵從今八十可至八百更
八千

題劔池驛樓詩舊日寶氣亭今撤而為樓

雙龍飛去已千年斗間紫氣夜黯然却今往往來來客
坐閱朝朝暮暮船天地與亭俱傳舍舊毀新成更代謝
舊亭不見見新樓新樓誰作今州侯州侯溫溫廊廟姿
三年涖政民不威政成遺惠及賓旅又與江山發新趣
昔舊今新新復舊劉郎去後何人冑樓新樓舊謾勞心
江光山色只如今著我憑闌觀水逝遊目兩間尋寶氣
猗嗟世上無張雷有缺莫彈歸去來

題女真調馬圖

此是女真調馬圖百年盛氣豪中區後來更有精彊者
覽圖撫事增嘻吁上古神龍負圖出豈必驅除須此物
誰其却之服糞車欲畫此時無此筆

次韻蘭谷東寄

子行過此不少屬翩然一葉東下舟聞之追及鄧林觀
望極黃洲洲外洲觀邊得憩皮氏館出子詩句談因由
五峯新月曲如鉤同觀有客可人不早還赴我避暑約
約到仰山山頂頭

次韻玉清避暑 二首

塵西水北有佳處五月六月泠泠風移將上界清淨下
豈為塵世熱惱同若人睡厭黃琉璃曉夢驚走紅宇宮
起來忽忽動逸興倒指疇昔閑過從相邀來真無何境
嗒然熟視誰長雄談邊了悟蟬脫殼區中局促鳥在籠
盃行笑語各忘倦西景徐射寶藏東歸來勝帶煙霞馥
一眉初月浮高空新詩追紀昨遊勝泉思湧出清無窮
善觀慙我非李子世業早已荒壽夢況加白雪不易和

欲待他日不匆匆坐間政爾揮白羽門外又報來青童
和篇兩地一時至燦燦星斗羅璇穹旋溫鑊湯抽繭緒
陡覺平陸生奇峰擬代移文謝幕府且卷片玉還冰翁

又

至人逍遙隘八極九萬里外凌剛風山林果佳亦可愛
隅于互答萬不同塵囂近市那得此清冷幸有仙聖宮
炎天赤日汗如瀉美人邀我閑遊從涼風颭颭披襟受
誰與宋玉論雌雄飲酣頗厭斜照入上訴欲借輕雲籠

哺時主客各散去水南水北分西東繞纏竟墮綺語業
轉頭未遣諸有空碧梧公子逞秀媚紅蓮幕賓欺寒窮
小心肯甘示晉弱大膽一喙吞楚夢綉段贈酬一至再
錦囊馳遞遽更匆我才拆襪線苦短如彼采木山已童
倦鶴低推合鳴喙有時嘹亮聲振空詩成滿意手自舞
漸覺黃點森眉峯數莖髭白撚未斷覽鏡依舊皤然翁

張道人開華蓋山路

我家紫玄洞天前仰視天與山相連羊腸詰曲石華確

每欲飛上愁攀緣道人可是堅願力開闢大道坦坦然
一躋從此出世外著我直透崑崙巔浮游握手筦爾笑
與子別去何千年

和王講師食官長吉州俸米飯長句

公不見鄭老襟期人未知杜陵野客道是真吾師豈嫌
官冷飯不足令人傳播坎軻詩又不見王子求僊未當
癡餐松啖栢自可永不饑得浮邱公接引去吹笙大醉
真絕竒如何白須鰲頰黃塵裏閩山千里趨江湄恠事

怪事一怪之有鉢誰為先生持先生莞爾笑余陋天涯
海角只此藤一枝片雲孤鶴任飛去雙轂雙履不要推
挽不要提逢人得醉且共醉烏論行藏久速宜不宜主
人肯與飯一匙可三千載不語離吉州米價何足問東
廣等處皆當為吾發運充度支我笑先生太貪饒何異
啼叫索飯兒假饒便便經笥作飯袋舍衛大城千百十
衆一食無猜疑瀾翻三十二句偈不肯割捨一飯恩愛
將報誰先生微笑面壁西答云未可三十二相觀如來

吾言元非真語實語者觀吾要在大寐不食無言時

題柴氏悅親堂圖

柴宗貴戚昔嬋媽有后有帝已越三百年柴氏孝行今
延緣有圖有詩又越三十年貴戚幾時降為庶孝行百
世芳猶傳與圖歌詩悉盡草木腐惟有彞性不泯長終
天晚周何啻一千五百載至今人慕參與騫後來史書
亦立孝行傳柴家子孫孫子尚勉旃

詩十二韻留別治書相公干轉呈中丞相公

昔年曾在京華見此日江干重會面天然粹美金玉相
學力逾深筆逾健帝分清廟瑚璉器往正南疆十司憲
敬從厥長猶父兄協比乃僚等朋援務存大體已嚴重
肯作小才須耀炫沉思聖代設官意普愛遐陬若畿甸
為恐螟蟲害嘉穀年年遣使巡行遍龔黃卓魯不多得
期扇廉風滿州縣云胡百川漲渾流宋子齊姜亦倡賤
閭閻耳目駭視聞何道能令習丕變一時栢府俱正人
潛運化鈞速郵傳外垣執法終夜明北望紫微遙睽睽

曾君希轍以道法遊諸方徵予賦詩

神僊方伎曾聞語道術根源誰作古靜宇元神非寂照
動驅祖氣因想取認將平地是煙霞變幻晴天忽雷雨
有符坐制物魅伏勿藥立看民病愈嗟我侗顓殊未解
多君狡獪能如許侍宸靈素今遠矣好往諸方鳴法鼓

玉宵詩贈玉成教諭

玉宵山人通身酒淋漓醉墨龍蛇走偶然山邊行一匝
攬取雲煙十之九如何止分山半截不謂此山可全有

歸來小立象山巔俯視羣山俱培塿

八駿圖

陰山鐵騎千千匹雨鬣霜蹄神鬼出風馳雲合暗中州
蹂盡東賓西餞日豈皆騷裊與蜚黃拓土開基功第一
忽於紙上見八駿穆滿所乘最超逸如今已死骨亦朽
漫向毫端想毛質當時造御天上藝僅到瑤池王母室
暮雪霏霏黃竹歌日行三萬竟如何逢時莫問才高下
只與論功孰少多

題玉霄贈西山胡氏筆工

醉滕用筆晞顏張醉餘得意非風狂固知筆貴鋒中藏
胡家洪筆耐似杭工書者聞吾未試因是是之誰敢嘗
一望茶坊酒肆中壁上家家玉霄字

贈寫真劉壽翁

黃洲橋邊個儻人號曰相山劉寫真眼前名士描貌遍
亦及中林麋鹿身生來自揆形相惡赤準高顙面如削
武夷擢舟歌九曲洛社深衣園獨樂人言相似我言非

只合幼輿置巖壑可憐筆墨誤點染彊使垂紳望臺閣
聖恩天廣覆羣臣百年勲閥長如新誰將子上南薰殿
為寫褒鄂光麒麟

龜室

并序

天久不雨人家沼中水竭泥燥見一龜朝夕
避日無可藏伏隱蔽之所命童覓甕為室以
居之

嗟汝至靈物見汝亦可憐曳尾汙泥中爆背枯池邊朝

晝暮夜露甲殺勃窣蹯跚倖邪索西徙東遷避炎熇旋
遶不停周四角既無清冷之水可洗濯又無蛇蠃之穴
可寄託幸不遭豫且傷不逢孔愉戕我今命童奴甃甃作
爾居非如楚相穿窟室聊似幽公壘陶復嘉汝不與雞
鷲爭啄栗嘉汝不與豺虎爭啖肉日精月華自可實汝
腹何營何求自可安此屋豈須蓮葉然後出遊息豈必
著叢然後入藏伏慎勿輕易泄靈智預人家國禍福事
將府汝以山藻之節稅將襲汝以廟堂之中笥與其君

王所寶榮且貴孰若野人所坑辱且棄嗟汝靈智誰可
同能與汝友惟神龍偶然行雨凌太空還當與汝相守
壽等天地無終窮

送里中星禽人往東廣省兄

蛟龍變莫測虎豹文且威昂然馬牛大叢爾蚘蛄微是
何區區者而盡化化機猿鶴沙蟲果類應百千萬種未
可幾吾嘗問天天不語惟見碧空夜夜流清暉里中斯
人傳秘妙形形象象四面圍所安林藪悉羅罽洞視情

性兼瘠肥敢將物賤擬人貴謂有百是無一非擔頭擔
術庾嶺去廣蛇潛蟄江燕歸難兄執筆司福禍萬命懸
寄一手揮二十八禽休細辯好在天際脊令鴻鴈飛

壽王講師

欲雪未雪雲黯黑不知此日神僊謫桃實今經幾度紅
梅花仍似當年白厭向閩山食荔枝喜來江浦訪鸞簫
廣文客舍寒如許自有春風長藥苗

題米元暉山水

一水兩山間水如練帶山如闌昔見江山似圖畫今觀
圖畫如江山米家下筆亦等閑盧家珍襲同瑤環一朝
身後落人手又為好者開歡顏我家一幅廣長畫朝夕
對之如列班有力莫能偷奪去常青常白色不黯若將
此幅與論價仇金何啻千千鏹

送真楊師遠遊

黎君曾著祖生鞭銜石欲把滄海填風流雲散事已矣
何處韜藏三畧篇如今老去視顛顛反耕築室治寸田

古來豪傑多神仙
佇看騎鶴凌紫烟

如齋詩

五金同入大冶爐
洪纖厚薄各異模
孰高孰下孰脩短
孰為不足孰有餘
浩劫變成只須臾
百年何事分戚愉
至人謂性不謂命
性惟一本命萬殊
君家畫出太極圖
誰知太極本來無
道有所如還不是
如如不動乃真如

卽千江月來軒

千江有水無人吸
江裏月來何處入
若浮水外入江來

卷九十八
水浸月輪應解濕在天一月在江千千月還同一月圓
水中月影元非月無所從來月在天

羅漢圖

四大假合成幻身大地山河俱幻境傀奇礫砢十六尊
得遇世尊為摩頂諸多伎倆近狻猊雖未大乘亦機警
有能領取像外意閉目超然發深省畫人漫灑毫端墨
觀者只疑燈下影慈尊長閑衆生癡直到于今癡不醒

贈畫史黃庸之

混濁誰是老畫師幻出形相萬不齊如梧如竹如桃李
如水如雪如虹霓堂堂人中廊廟器淡淡物外江湖姿
獨予醜惡類蒙俱執拗頗亦見頰頤古來伊周匪易為
老不用世免諂譏黃工筆意神更奇寫偏麟鳳到鹿麋
付與鄧林嘉客去歸挂壁角儕鍾馗豈能夜深吐怪犯
牛斗或者歲久化象乘尾箕

自牧歌贈僧自牧

曾聞牧人處林下擊鼓用兵先喪馬又聞牧人殺與臧

讀書博塞俱亡羊嗟爾牧人何所務務在留心嘗管顧
吾師條繩綫定水牯牛不容斜視略回頭有時純熟鞭
不動來亦無擒去無縱毛羣齊足不亂行人生自得兩
相忘大衆茫茫少閑暇誰非喪馬忘羊者

送時中內翰

氣馭龍光上衝斗才謨牛刃新發硎芳菲拾盡禿汀若
奇險楚屈號湘靈曾聽姚程二公說相期冬蟄轟雷霆如
何不留掌帝制而使汎汎猶風萍里曠不羞見者走衆

醜共媚孤娉婷山玉崖珠豈終閱鷗班螺甲姑自馨皇
心急士甚渴渴識子會有天眼青

送江州學錄潘興祖

潘生年少醇美資往往湓浦來語違紛紛末學銜華辭
願汝實學培本基慎獨畏天勿妄為交朋每事毋誑欺
狄侯曾作宰相師汝可慕儆終身規

贈楊山人

易言山下有火賁冲暖溫和平生萬類葬書暗與易意同

納人死骨乘生氣苟得其術宜深秘慎勿求人售富貴
各有正業惟四民我食我衣方無愧

李母慶九十

李翁八十壽考終李母九十猶女工耳聰目明四體健
禮賓奉祭饋必躬大兒七十小半百李門諸婿皆如龍
孫男有六曾孫五才賢衮衮方興隆誰能一家五福備
信知積厚報必豐子貞學士為予說作詩聊續十五風

題張郡侯慶壽

八十五歲張子野彊健風流老瀟洒一百餘歲張北平
含嘻乳哺還孩嬰兒人間大福無如壽張家壽者時時有
清河郡侯家栢鄉漢宋二張鴻鴈行只今八十又踰五
未來一百從今數壽星光裏舞欄斑兒孫玉雪翁朱顏
腰繫黃金身衣紫焜赫天恩耀閭里生封侯國天下榮
三尊備具身康寧侯家積善已數世顯親輦自殊科使
殊祥有志晞騫輿晨昏致養親歡愉綺羅筵上開春酒
賓客駢闐祝公壽喧傳盛事至京師朝士人人為賦詩

鋪舒世美誰椽筆董相文章今第一

過枯河

高堂出郭二舍近午憩東陽安樂鎮雙堤對峙似城墻
中坳一道如壕圳驅車下坂抵坳行低平盡處還復登
半坳一門字斗大濱鹽滄鹽兩分界不知此是古黃河
且行且顧心疑怪前詢父老為予言河北山東此處分
濱隸河南滄隸北河流已改界仍存古河來自白馬渡
東過開州城下去遂入滄河粵魯河入海當年猶此處

自從六七十年來南趨梁汴會于淮河患古來兖州極
今日兖州河道塞憶昔初通禹貢時道元漁仲遍參稽
萬語千言俱紙上親見親聞今指掌振古黃河北道流
漸漸南移天地秋今逕與淮同入海北行無用濟河舟
世事古今大奇變豈但蓬萊更清淺他年欲續山海經
聊述此詩紀聞見

題東坡載笠着屐圖

白鶴峯前井赤鯁遠徙又化南溟鯤城南白晝魑魅現

賴有東黎諸弟昆，腥鹹滿口無異語。似人恹意聊過門，
竹刺藤梢歸路晚。濛濛霧雨天欲昏，御人不識臧紇聖。
抖擻雨具相溫存，天涯禹跋不到處。要使舊攢留新痕，
荷笠俄成牧羊叟。誰憐海上屬國孫，衰童拍手接籬倒。
庸犬驚吠扶桑暎，先生招怪每類此。白首幸免長鯨吞，
何人為作野老像。風流不減乘朱轡，謫來天仙墮塵網。
化身千億難名論，我從像外得真相。神交心醉都忘言。

題牧牛圖

樹葉醉霜秋草萎童驅鰈涉淺溪一牛先登舐犢背
犢毛濕濕猶未晞一牛四蹄歸在水引脰前望喜近隄
一牛兩脚初下水尻高未舉後兩蹄前牛已濟伺同隊
回身向後立不移一牛將濟一未濟直須並濟同時歸
此牛如人有恩義人不如牛多有之人不如牛多有之
笑問二童知不知

吳文正集卷九十八

欽定四庫全書

吳文正集卷九十九

元 吳澄 撰

韻語

臨江仙

九日舟泊安慶城下晚惕臨江水驛于時月
明風清水共天碧情景佳甚與徐道川方復
齋况肩吾方清之驛亭草酌子文京侍以殊

鄉又逢晚秋分韻得殊字賦臨江仙

去歲家山重九日西風短帽蕭疎如今景物幾曾殊舒
州城下月未覺此身孤勝友二三成草草只憐有酒無
菜江涵萬象碧霄虛客星何處是光彩近辰居

謁金門

依韻和孤蟾四闕

如何喜自喜自知可矣天地與人同一理世人知者幾
六十循環卦氣歲歲二分二至坎險何妨離附麗共

誰研底裏

如何樂見孤蟾輪郭莫道箇中難捉摸細尋應會錯
斫桂吳生善謔管甚高深廣博記取嫦娥端的約當空
圓不落

如何改認得吾廬堪愛虛敞玲瓏無障礙主人常只在
得此非因賜賚得此非因賭賽占斷這些閑境界儼
來成永買

如何悟靜看風前雪絮飄落晴光明媚處易晞還似露

大笑忽然回顧日在天心幾度八萬里中元不暮往
來經熟路

渡江雲

揭浩齋送春

名園花正好嬌紅帶白百態競春粧笑痕添酒暈豐臉
凝脂誰與試鉛霜詩朋酒伴起此日流轉風光儘夜遊
不妨秉燭未覺是踈狂 茫茫一年一度爛熳離披似
長江去浪但要教啼鶯語燕不怨盧郎問春春道何曾

去任蜂蝶飛過東牆君看取年年潘令河陽

木蘭花慢

和楊司業梨花

是誰家庭院寒食後好花稠況牆外秋千晝喧鳳管夜
燦星毬蕭然獨醒騷客只江籬汀若當看羞冰玉相看
一笑今年三月皇州底須歌舞最高樓興味儘悠悠有
白雪精神春風顏貌絕世英遊從教對花無酒這雙眉
應不惹閑愁那更闌西夫子許來同醉香筇

再用韻

正羣芳開遍花簇簇藥稠稠看艷杏夭桃蒸霞作糝輒
繡成毬天然素肌仙質對穠妝艷飾似含羞癡絕京華
倦客貪春忘却南州似傳聞天上玉為樓此事付悠悠
且白晝風前黃昏月下爛熳同遊神凝藐姑冰雪又何
須一醉解千愁自有壺中勝賞釀來玉液新篳

三用韻

好風流詩老雙鬢上雪霜稠憶少壯歡娛呼鷹逐兔走

馬飛毬春風斷腸柔唱拚千金一笑破嬌羞此日花時
意氣當年夢裏揚州對客床百尺卧危樓往事總悠悠
把湖海人豪消磨變換洙泗天遊應知裂麻司業為前
時諫舌頗多愁去今却堪痛飲甕頭有酒頻篋

四用韻

看風花煙柳濃又淡少還稠有小巧微蟲垂天布網轉
地搏毬冲融一般春意只啼鶯語燕向人羞收取塵間
樂事都歸杓裏舒州下綺筵珍饌醉青樓光景信悠悠

柰蝸隊蝦羣空中聚散水上浮遊誰知太和真趣本無
愁何用更澆愁問字頻來未已漉巾不要親篋

水調歌頭

四垂雲掩曖一夏雨溟濛千奇百怪驚人海蜃眩青紅
誰道穀城黃石混跡長安紫陌九萬里培風靜夜歛澄
霽皎月麗中天人問今年年幾許尚童蒙慙癡自笑能
裨造化竟何功豈意京華倦客忽得蓬萊妙唱流響韻
商宮此去兩神劍終久會雌雄

欽定四庫全書



吳文正集

吳文正集卷九十九

欽定四庫全書

吳文正集卷一百

元 吳澄 撰

韻語

楚語

雜題

楚語

約離騷

靈宗嬋嫣謀高陽
筭路籃縷啟南荒
祖瑕食屈夾葉光
蹇予初服雜衆芳
蕙纓蘭佩芙蓉裳
忍令遺棄官道傍

靈脩收拾充幃囊先後皇興驟康莊好姁佳麗蛾眉揚
衆妬謠詠言如簧牛女中道成參商所天不二何可忘
中腸踴躍如沸湯投淚哀吟寤后皇下凍昇澆桀紂亡
上述三后躋虞唐雲旗龍駕環四方終然臨睨悲舊鄉
浮雲蔽日夜未央終不見天老人狂貞臣一變宗國疆
登天有夢魂無抗國事顛倒衡人張絕齊婚媾親虎狼
秦關月冷空徬徨興尸東歸涕泗滂天未絕楚郢有王
寢苦枕戈膽可嘗不幸言中臣罪當天乎何辜竄江湖

君恩已矣無復望繾綣側怛臣所臧九歌天問繼九章
求僊問卜歌滄浪讒人壅君恨不彰臨絕之音轉琅琅
一經六傳相頡頏至今光燄亘天長為千萬世扶三綱
比經風雅伯仲行九十四章三百七十有六句言言壹
為靈脩故後世不知原所愬祇把離騷等詞賦模擬逼
真誰得似玄翁胷中富奇字赫赫官稱亦大夫大夫還
反楚三閭三閭當日沉湘意臣僕於人不如死魚腹清
魂招不回悠悠千古何人哉一死一生同一哀晉士一

篇歸去來

泗濱四章 并序

泗濱美善長也善長蓋氏而居泗之濱焉

泗之濱兮結屋樹蒼蒼兮波綠挹其清兮可沐首雖俛
兮心不覆 杲杲兮東旭晞予髮兮陽之谷就其深兮
可浴澡予身兮濯予足如垢淨兮莫予敢黷白皓皓兮
人如玉

泗之濱兮出遊蔭喬木兮潁清流顒顒魚泳兮鳥嘒幽

幽風輕雲淡兮書景悠悠馬駢駢兮轡柔蹇予省兮松
楸野老爭席兮竟日綢繆解后芻人兮猶不忘乎諏謀
驟天衢兮策驂駟胡於此兮淹留

泗之源兮縈紆經魯阜兮派南洙合流兮舒舒借微潤
兮澤萬世而有餘沛歌大風兮惟霸之符彭城恃力兮
子羽噫鳴二雄陳迹兮俛仰已无湯湯自如兮襟帶揚
徐濁河橫潰兮不與同汙非清沂清淮兮誰與為徒
泗之流兮沕湔逝如斯兮夜繼日風帆兮迅疾千里尋

常兮往來忽歟屈折而東兮奚固奚必沈浮任物兮
出汨入滔滔兮汨汨積小成大兮不遺纖悉彌遠彌多
兮靡殫靡畢終然到海兮會萬川為一

楚歌五首勸潭士歸鄉

滌徑兮篁叢露沾衣兮翳夫蒿蓬塊獨立兮山中寒何
人兮忽予從

袖在兮懷孫閱其馨兮艱不得聞翦紙兮招離魂坐三
沐兮三熏

鬢髻兮尾瑣影隨形兮我我中渴饑兮焦火夢西江以
供吸兮沙飯顆顆

又

湘水兮沅沅莽千里兮九疑之雲朝朝暮暮兮晴復雨
十年不見兮我心苦

湘竹兮脩脩淚痕雖乾兮滑欲流天寒歲暮兮之子無
裊君胡為兮此淹留

題蘆鴈飛鳴宿食圖

敗蘆兮蕭蕭肅肅兮
替替驚夜兮
次寥為一飽兮
辱泥滓以劬勞
鴻冥冥兮
九霄侶大鵬兮
逍遙

楚語贈歐陽尚古

歐陽尚古將遊孔林遂游京師壯哉斯遊也
吾聞君子之愛人以德不以姑息於是作楚語招之其辭曰

嗟嗟子之為斯遊兮
余一不知其何求
工居肆以締造兮
農服勤乎畎疇
買宅市以貿遷兮
商致遠乎車舟
繫淳古之安土樂俗兮
行惘惘而靡由
雖中世之賢能兮

長治亦不出乎鄉州逮春秋戰國兮孔孟皇皇而周流
蓋聖哲之不得已兮庶幾民病之速瘳彼儀秦妾婦以
希合兮大丈夫之所羞六一公之違墳墓兮寓於隨而
藏脩竟薦書以策名兮不聞未仕而遨遊今聖代之隆
盛兮多士咸蒙其庇庥勵行業於家庭兮歟茲舉而雲
浮縣里選而天府兮脫民伍而贊皇猷又奚僕僕於道
路兮躡躡於王侯惟孔道之曷陽兮若大明之燭幽瞻前後
而無不在兮豈在乎堂防之一杯子有太平十二策兮

姑待對於宸旒抱璞而自獻兮仲淹未免乎愆尤歸來
歸來兮息藝圃以優優異時快意觀光兮固異乎今日
之羈愁歸來歸來兮馴猿放鶴聊淹留辭曰秋風兮嫋
嫋莽汀洲兮蘋蓼于何之兮天渺渺珠在淵兮月皎皎
冥鴻萬里兮俟于雲表

雜題

題鄭印心龍頭

冬而沉冥夫孰測其頭角崢嶸也春而奮興又孰測其

雷雨發生也時止時行初真後亨吁嗟客鄉善得其情
題況生手卷

欲渡未渡兮岸側夷猶之舟欲到未到兮雲中縹緲之
樓何時天風泠然臂兩翼瞬息飛步過十州

跋牧樵子草蟲

維野有牧見彼子于維山有樵見彼嚶嚶子豈樵夫子
豈牧豎子何見聞深解蟲趣牧樵子言此論未然聞聞
見見得者淺淺維蟲能天天固在我非牧非樵亦何不

可

跋虎溪三笑圖

一谿不過限隔爾我偶接高人容易打破六眼相視大笑呵呵法界無邊吾師知麼

題王氏洗經圖

淨洗淨洗莫留一字併將故紙撇在水裏空手歸來無可執把如是如是了悟者

題東溪周氏畫魚

得所得所鄭相可欺樂也樂也蒙叟安知畫好畫好一
點千癡

題子昂竹石

匪竹匪石伊松伊雪作如是觀竒絕竒絕

題馬圖

頰首齧蹄昂首欲起誰其御之一日千里

題牧樵子草蟲

入機出機走草飛草真假俱幻玄造玄造

跋草蟲

嚶嚶趯趯蠢蠢蠕蠕誰之所為自然而然

跋一犁春雨圖

聽人使喚依理耕種稼穡休犯見草休動

跋牧牛圖

齁齁鈎鈎這般頑牛把鼻拽轉尚不擡頭

題飛鳴宿食四鴈圖

前者東後者西好兄弟胡相違

天宇高陰風號儘磬磬誰汝勞

水深深夜沉沉無人舉火蘆荻林

湖澤卑菰稻肥何事春來又北歸

宋徽宗二鵲圖

帝皇之世巢可俯窺萬機餘暇及此玄微

昔觀二鵲今觀二鵲筆意如生撫卷淚落

題劉壽翁為予寫真

見家藏遺像墨蹟

里人劉壽翁為予寫真見之者咸曰此朱夫子像也其

有若之似與抑陽虎之似與予為此思識者鑒焉草廬
六十翁始生之日題

自警二首

前丙寅十八歲作

氣昏嗜卧害非輕才到更初困倦生必有事焉常恐恐
直教心要强惺惺縱當意思沉如醉打起精神坐到明
著此一鞭能勇猛做何事業不能成

又

元來一片虛靈府埋沒經年滓穢場不特通時多走逸

覺於靜處亦飛揚
晝間常被事牽引
夜後猶如夢擾攘
喚起主人翁
警省自家三徑不容荒

題閤皂山

漢吳仙跡兩峰齊
欲拾瑤花路恐迷
寶殿青紅疑地湧
林巒蒼翠接天低
九重香案分雲篆
八景琅函記玉題
仙鶴翔空清似水
步虛聲在朶梅西

題蘇李泣別圖

節旄盡矣自須存
此日生還侍主恩
策杖謾循椎結泣

平陵有子廣無孫

送陳小庭之廬山

匡廬幾千仞崔嵬上有天仙相往來我欲遊之未遐遠
君今往矣何時回我遊我意亦無佗君遊君意還如何
豈為昔人詩句好豈為其間僧舍多天地升在最高頂
谷簾界天直下懸銀河我觀此水注湖注東注入海復
隨海日騰湧上天偏飛洒飛浩浩蕩蕩無塵界萬生活
動增恣態流無轉窮萬萬載更萬萬載匡廬山不改

晦庵畫像贊

義理密微蠶絲牛尾心胷恢廓海闊天高豪杰之才聖
賢之學景星慶雲泰山喬岳

寧可無頃

風吹枯木不搖水激方輪不動畢竟有木有輪惹起風
號水湧雖如泡影露電也被眼根覩見諸有都歸變壞
萬劫一空長在

已上自白警二章起至此見風雅集今增入

贈術者自言能通皇極經世訣

戊辰五月

六合之外大無方一氣所到何渺茫浮陽運轉無停止
濁滓凝結留中央不用安排理自然能知其理為知天
區區象數特糠粃屑屑推占心愈偏偉哉邵子蓋世英
天光宇泰何靈明南禽聲裏知人事枯樹枝頭識物情
天地中間物幾般古今來往事多端玲瓏樓閣虛空裏
八達四通皆洞觀世人膠漆盆中鉤趨亦趨兮步亦步
未得逍遙林下心焉能默會環中數風角鳥占世不少

凡是術家皆可了觀海廼令河伯歎登岱始知中山小
嗟予用工在格致觀書亦嘗到經世窺天豈不見分毫
對人何敢談容易如君幾載江湖客自道有傳并有得
臨別聊陳我一言熟玩之餘細消息

贈金工新學篆剔

癸酉六月

赤幘白衣逞妖媚工倭驅歸宋無忌鍊骨範形鰐鑿奇
花葉龍蛇有生意靈心巧智隨機轉鼎足釵頭得新製
棗刻逼真瘦與肥朱絲屈盤闔神麗姓名千里一封書

萬口沫流天上藝他年鑄就左顧龜倩生為剔全窠字

宜黃友人遠遊不反因其投贈用韻招之

乙亥七月

君平歸來鳳山巔明月清風相款延窮冬笙簫響松檜
盛夏霜雪飛湍泉步屨春躋赤松嶺擎舟秋泛黃華川
賓朋過從亦足樂談王說霸浩無邊詩思發來把酒沃
睡魔寇我呼茶煎人生窮達固有定富貴不在人着鞭
袍笏堆床錢滿屋一身以外皆可捐從來肉食多肉眼
千古英雄苦叫天能除種種貪癡相是即生生自在仙

出門一步便荆棘歸家四壁賸霞煙山高水深橋梁絕
猿左狨右虎豹前投刺謁人困細字工書獻策費長箋
君不見長安富兒羅輦羶十日一炊稱世賢又不見朱
輪華轂諸王宅子雲默默守大玄歸乎歸乎盍歸乎女
上九關兮入雷淵

贈術者

丙子二月

金精山人李方叔到處山頭曾印足季袁術數景純書
許巫識鑒君平卜談天三寸舌瀾翻相地一雙眸歷碌

我欲從君問占筮已拚前程任伸縮我欲倩君看骨骼
生出世來知碌碌搜求天下佳山水又怕兒孫不禁福
布裙掛破芒鞋穿山靈秘護迷入目與君且飲數盃酒
寄傲荒村老茅屋日月無光天地黑微軀何翅太倉粟
臂挿雙翎背負雲側身北望吞聲哭君不見古來隧道獸
蹄腥空塚茫茫春草綠

和桃源行效何判縣鍾作

冀州以北健蹄馬一旦羣嘶廬藿下睢陽不過雙貂公

總是開關迎拜者燎原燄燄春復春不惟捧水惟益薪
海門浪沸會稽圻血淚交流草莽臣舉首日邊遠與近
不知官守何人問仲連未即蹈東海元亮至今尚東晉
桃源深處無腥塵依然平日舊衣巾擬學漁郎棹舟入
韓良寧忍終忘秦

懷黃縣丞申時避亂寓華盖山

丁丑四月

丞君丞君天一所十日不共床頭語粵從天紀渙散來
大半英雄化兒女舉世張頤啖糞壤君獨吐之不肯

如舉世眯目蒙埃塵君獨去之不肯處大鵬垂翅何人
憐神龍失水癡獺侮當道林林立虎豺深山處處多蛇
鼠不堪嘯聚沒復出近來眠食間幾阻奔逃無間天陰
晴腹背浴汗頭沐雨心如清水到底潔身寄白雲深虛
住伯夷叔齊上追蹤浮邱王喬兩為侶洞巖殷殷生風
雷仙館沉沉鎖烟霧山蔬可羹買米炊何須更學農與
圃有兒讀書紹家風有客清談忘世務我自遠來亦云
樂尋又別去徒延佇二親定省不可曠安得終歲屹屹

萬仞岡頭論今古

忍卦

忍

心下

元亨初吝終吉悔亡利君子貞不利小丈夫彖

曰忍剛發乎內柔制乎外小有所抑大有所益也象曰
心上有利刃忍君子以含容成德初一必有忍其乃有
濟象曰能忍其性事克濟也次二小不忍則亂大謀象
曰小不克忍成大亂也次三一朝之忿忘其身以及其親
象曰一朝之忿至易忍也忘身及親禍孰大也次四出

於膝下以成漢功韓信以之象曰膝下之辱小辱也成漢之功大功也次五張公藝九世同居書一忍字以對天子象曰同居之義忍克致也積而九世有容德也上六血氣方剛戒之在闕象曰方剛之氣忍則滅也形而為闕自求禍也

送樂希魯之高安征官

見樂氏家藏墨蹟

馬首向高安駝裘耐苦寒聖師曾委吏賢相亦征官初筮寧辭賤脩程此發端塵中吟不費有句寄來看


自贊畫像

峩峩玄冠肅肅玄端人今服古貌醜神完秋霜面目春
陽肺肝少也弗秉畊莘之耒老而弗持釣渭之竿徜徉
烟霞泉石之間悠然而有餘歡其自適於樂水樂山者
歟一吾山人自贊

又

身形瘦削春林獨鶴眼睛閃爍秋霄一鷄遠絕塵滓大
同寥廓自鳴自和自歌自樂以爾蕞爾之軀誰謂充

滿六合而有餘以爾熒然之目誰謂周流萬古而不足
舒舒其居也于于其趨也其山林樵牧者乎野之耕築
者乎



吳文正集卷一百

欽定四庫全書

集部

吳文正集附錄

御史_臣邱文愷覆勘

武英殿纂修中書_臣彭元琬

原序

吾儒之道三綱五常之道也故儒道之在天地間一日不可無者自先師孔子設教於洙泗之後惟顏曾思孟氏得傳斯道以為真儒餘未免惑於虛無寂滅之談溺於記誦詞章之習其於真儒蓋不易得也兩漢之儒固多而道統無傳有唐之儒亦多而道統罕繼惟昌黎韓子奮然而出歷序道統相傳之自有曰堯以是傳之舜舜以是傳之禹禹以是傳之湯湯以是傳之文武周公

文武周公傳之孔子孔子傳之孟軻而未有軻死不得其傳之言又有荀揚擇焉不精之語至於力排異端起衰濟溺而韓子所任之意亦有在焉由是觀之道統之傳有自來矣真儒之生誠不偶也宋德隆盛五星聚奎天啓文運篤生異人而吾儒之道燦然復明若濂溪周夫子康節邵先生河南程夫子橫渠張先生一時迭出以儒道為任繼而晦菴子朱子挺生新安上承孔孟之傳下紹周程之統顏孟而後此數先生者方可為道學

之真儒也迨乎前元真儒亦罕惟魯齋許先生草廬吳
先生焉耳先生才智過人默悟斯道遠沂洙泗之流而
窮其源近紹程朱之統而得其要上焉天文下焉地理
與夫九經之微辭與義以至諸子百家之言罔不研究
真知實踐而各臻其極有功於聖門有功於來學周邵
程朱數先生之後若先生許先生者詎非道學之真儒
乎第恨陽之生晚不獲擔簦負笈振趨於先生之門執
經問難侍從於先生之側一瞻先生之光以聽先生之

誨而求夫真儒之歸可勝嘆哉邇者叨持憲節道過臨
川懷思先生之道景仰先生之風乃得目覩先生之遺
文而私淑先生之教何其幸與吁先生之文道德性理
之文也先生之學周邵程朱之學也孔門千載而下若
先生者曾幾何人哉正所謂麒麟鳳凰世不常出景星
慶雲世不常現者耶陽忘其愚陋勉贅數辭於先生文集
之間者庶有以見歷代真儒之難得而陽之私淑抑亦
少寓於萬一云景泰辛未秋七月甲子後學會稽韓陽

拜手謹序

欽定四庫全書

吳文正集

附錄

年譜

并序

臨川吳文正公年譜一卷門人危素所纂次初公既捐館其長孫當嘗草定其次序又以請謚來京師以廕補官朝廷知其能世家學馴致清顯數期素刊訂其書以傳於世素惟及公之門者在朝在野猶有其人故屢致

辭讓當以江西肅政廉訪使奉詔招捕盜賊十年不返而最後及公之門者亦皆相繼物故素於是不敢緩也會繇禁林調官嶺北暇日取其藁頗加紬繹凡公自製之文見於集中者可以互見宜不必載其與人論辨勝負一時之言亦復刪去祭文輓詩行狀謚議神道碑并附見焉嗚呼方宋周元公倡聖賢之絕學關洛之大儒繼出遷國江南斯道之傳尤勝於閩境已而當國者不明重加禁絕嘉定以來國是既章而東南之學者靡然

從之其設科取士亦必以是為宗其流之弊往往馳騖
於空言而汨亂於實學以至國隨以亡而莫之悟公生
於淳祐長於咸淳而斯何時也乃毅然有志拔乎流俗
以徑造高明之域宋既內附隱居山林者三十年研經
籍之微玩天人之妙橐城董忠宣公力薦起之仕或不
久而即退或拜命而不行要之無意於為世之用著書
立言以示後學蓋燦然存乎簡編方來之英彥亦可以
潛心於此而無負公之所屬望豈非善學者哉素幾弱

冠以親命執經座下侵尋衰莫無能發明師訓夙夜畏
惕莫知所云年譜之成君子有以悲其志矣至正二十
五年正月既望門人榮祿大夫嶺北等處行中書省左
丞臨川危素序

公諱澂字伯清姓吳氏其先七世始自豐城縣

今富州

徙撫之崇仁縣六世周始居崇仁鄉之塢原生二子
璣璿宋高宗渡江選民為兵璣以繇役長鄉兵戍江
東因家太平州璿生煜公高祖也謹厚慈儉家自饒

裕有冠自寧都縣

今升州

境至屋廬盡燬改築於吳山

之下曰咸口年至八十餘曾祖考太德澹然無時俗
嗜好中年即謝家事優游林泉亦享耆壽祖考鐸工
進士詩賦精通天文星歷之學寬厚不屑細務考樞
溫粹純實謙退不與人爭善為方里嘗大札業醫者
多畏傳染不敢往視或盡室不起乃煮善藥命一力
持以自隨給以飲之全活者數十家有喪不能舉者
竭力周恤終身以為常妣游氏生二子長則公也

宋淳祐九年己酉

附錄

正月壬戌日申時公生

十九日公生前一夕鄰媼夢神物蜿蜒降於舍旁之池中

里父老云豐城徐覺得望氣之術見紫氣於華蓋臨川二山之間謂人曰是必有蓋世偉人生焉公稍長與覺遇諸鄰邑覺驚異曰向吾所占偉人子良是幸自重

十年庚戌

十一年辛亥

三歲穎異日發

公三歲大父每讀古詩愛之漸至數百篇琅琅成誦游夫人攜過里姥姥

惠以錢果公敬受之終有漸色密置之而去

十二年壬子

寶祐元年癸丑

五歲就外傳

公五歲始就外傳穎敏殊絕讀書累千餘言數過即能記自是日務勤學或至

達旦游夫人慮其過勤致疾量給膏油僅可夜分乃密市油伺母寢復觀書且障其明恐為母所覺也

二年甲寅

三年乙卯

七歲

論語孟子五經皆成誦能屬詩通進士賦

四年丙辰

五年丁巳九歲

鄉里鄰邑課
試每中前名

六年戊午

十歲始得朱子大學等書讀之

讀大學中庸朱氏章句
公嘗因學者求

讀中庸語之曰吾幼時習詩賦未盡見朱子之書蓋
業進士者不知用力於此也十歲偶於故書中得大
學中庸章句讀之喜甚自是清晨必誦大學二十過者
千餘日然後讀中庸及諸經則如破竹之勢畧無疑
滯矣學者於大學得分
曉則中庸不難讀也

開慶元年己未

景定元年庚申

二年辛酉

十三歲大肆力於群書應舉之文盡通

公於書一覽無不盡記時

麻沙新刻古文集成因家貧從粥書者借讀踰月而歸之粥書者曰子能盡讀之乎公曰試抽以問我隨粥者舉問輒盡其章粥者驚異遂贈以此書

三年壬戌

秋時十四歲卅角就撫州補試

按公撰許母墓誌云余以童卅就郡學補

試同邸有一先生長者視予所作賦勉而教之試畢各不問名居而去後八年予忝鄉貢工歌鹿鳴之燕向所見先生長者在焉問之則臨川許先生功甫也其年為江西轉運司所貢士

四年癸亥

十五歲知厭科舉之業用力聖賢之學作勤謹二箴

公年十有五深知科舉業之不足致力專務聖賢之學因讀朱子訓子帖得勤謹二字謂真持養之要經為學之作敬和二銘公曰吾讀敬銘則使人心神收大務作敬和二銘飲百望俱消如在靈祠中如立嚴師側淒淒乎其似秋而不覺足之重手之恭也讀和銘則使人心神怡曠萬境俱融有弄月吟風情有傍花隨柳想熙熙乎其似春而不知手之舞足之蹈也

五年甲子

秋侍大父如郡城

時大父赴鄉試會郡守延致番易程先生若庸於臨汝書院采李士

習惟以進取為務程先生嘗遊石洞鏡氏之門獨以朱子之學授諸生公謁見升堂歷觀其標貼壁間之說有不盡合於朱子公乃一一請問如所謂大學為正大高明之學然則小學其卑小淺陋之學乎程先生悚然曰若庸處此未見有知學能問如子者余之子仔復族子樞之皆與子同年生可相與為友自是公每至郡必留臨汝樞之翰林承旨程文憲公鉅夫舊名也

咸淳元年乙丑

八月作襟識五章十月己丑作顏冉銘十二月戊子

大父卒喪葬凡役公悉考古禮稟於父左丞公而行

之大父寢疾公侍其父視藥食不就寢席者凡十餘夕無怠容大父嘆曰吾察此孫服勤連晝夜不懈

而神氣有餘比大
施可望其善教之

二年丙寅

冬葬大父於圯原之古宅十一月壬子作理一箴

三年丁卯

十九歲作道統圖并叙較正孝經

又取他書之言孝者為外傳十篇

公謂朱子於諸經各有成書獨未及於書於春秋欲取諸家之訓說而成朱子之志精力方強凡天文地理律歷田賦名物算數博考經傳而得夫觀察之微制作之故
作皇極經世續書
公潛心即子之書每病夫昧者流為術數之末遂以先天六十四卦分配一元之數推治亂相禪之由而為是

書兵火後散軼不存通趙主簿書作自新自修消人欲長天理
克己悔過諸銘

四年戊辰

作題四書一章紀夢一章襟識一章矯輕警惰二銘

五年己巳

六年庚午

八月應鄉貢中選

以乾卦保合太和萬國咸寧賦中第二十八名答繆郡守

書答程教授書作襟識二章

七年辛未

春省試下第三月癸酉纂次舊作題曰私錄

程先生識其後

曰若庸來此二十二年閱人多矣未見年方弱冠而有此志量有此工夫廣大精微無所不究如畫方旦

何可量也僕雖老不敢自棄願聞切磋語

八月至臨汝書院

留止數月

八年壬申

授徒山中

九年癸酉

十年甲戌

授徒樂安縣

以縣丞黃酉卿之招
酉卿蜀人忠義士也

大元至元十二年己亥

撫州內附

十三年丙子

奉親避寇

時寧都
盜起

十四年丁丑

十五年戊寅

十六年己卯

十七年庚辰

隱居布水谷

公與前貢士樂安鄭松結廬谷中谷存樂安之高山上有田有池羣山外環唯

一逕河通縣崖飛瀑而出故曰布水屏絕人事輦歌年歲今為古隱觀以公舊隱故也

十八年辛巳

留布水谷纂次諸經注釋孝經章句成

十九年壬午

留布水谷較易書詩春秋修正儀禮小戴大戴記成

二十年癸未

冬還自布水谷

二十一年甲申

五月己酉朔父左丞公卒

公居喪治葬率循古制參以書儀家禮行之鄉黨姻

戚亦多依效不用浮屠里俗或譏之則以為解

二十二年乙酉

居喪冬葬父左丞公於里之魯步東邊

二十三年丙戌

八月釋服

程文憲公以江南行臺侍御史承詔訪求遺逸有德行才藝者即驛送入覲冬程公

至撫州命郡縣門勞迎致強公出仕力以母老辭程
公曰誠不肯為朝廷出中原山川之勝可無一覽乎
公諾之歸白十一月如建昌路同行故也

二十四年丁亥

春適燕

程公疏上所薦士以復命終不忍舍公公微
知之力以母老辭遂治任南歸公卿大夫多

中原老成而宋之遺士亦有留燕者皆知公之不可
留而惜其去相率賦詩送別閻文康公復之詩有曰
羣材方用楚一士獨辭燕趙文敏公孟頫方被召為
兵部郎中獨書朱子與其師劉先生屏山所廣三詩
為十二月還家舟中賦感興

贈十二月還家

詩二十五章

二十五年戊子

授徒宜黃縣明新堂

宜黃吳東子建義塾扁曰明新堂設先聖像行舍菜禮奉書幣

聘延公次徒其中屬隣境有警乃奉游夫人寓門人鄉志道舊廬自留寓塾數月

秋還家朝

命求較定易書詩春秋儀禮大戴記小戴記

程文憲公請於

朝曰吳澂不願仕而所考易書詩春秋儀禮大戴記小戴記俱有成書於世有益宜取寘國子監令諸生肄習次第傳之天下朝廷從之遂移行省遣官詣門膳寫進呈仍令有司常加優禮

二十六年己丑

進呈諸經

令藏國子監崇文閣見書目

二十七年庚寅

二十八年辛卯

夫人余氏卒

夫人諱惟恭父珏世居里之余溪寶祐三年二月庚寅生得年三十有七

二十九年壬辰

三十年癸巳

三十一年甲午

以上皆元世祖朝

正月甲子如福州

程文憲公為福建閩海道肅政廉訪使迎致焉

十一月戊

申還家

元貞元年乙未

元成宗朝

八月如龍興遊西山

江西湖東道肅政廉訪使司經歷郝文聞公至來見問易疑數

十條留居郡學有答問之辭郝君命吏從旁書之令學者傳錄名曰原理○朔南士友問學者衆時元文敬公明善自負所學論經之次輒屈其坐人間公至賢諸經疑難數十條問春秋尤多公隨問剖析元公大加畏服以為平生所遇明經之師未見如先生者及論性理未甚領悟公令其觀程子遺書及近思錄元公嘗讀是書至是始潛心力究而有所得他日謝先生曰先生所學程朱二子所學也請執弟子禮終身城中士友及諸生請開講郡學公說修己以敬章反覆萬餘言聽者千百多所感發

十一月

還家

二年丙申

如龍興

時董忠宣公士選任江西行省左丞元文敏公其客也辟為掾以教其子公執謁於其館

董公聞之親饋食中堂頗問經義治道顧元公曰吳先生德容嚴厲而不失其和吾平生未之見也

大德元年丁酉

成宗

二年戊戌

董忠宣公以江南行臺御史中丞入覲改僉樞密院事力薦公於朝堂吏頗緩其事一日議事郝堂董公起立語丞相謂勒哲平章軍國重事東平文貞王博果密曰士選所薦吳澄非一才一藝之能也其人經明行修論道經邦可以輔佐治世大受之寵也皆曰僉院賢實所薦必天下士何疑焉會平章拜御史中丞尋薨不
及用公
七月母夫人游氏卒

三年己亥

居喪

四年庚子

六月作正中堂於咸口之原

長子文治其後堂成程文憲公為之記趙文敏

公篆其額八月釋服

五年辛丑

授應奉翰林文字登仕郎同知制誥兼國史院編修

官

董忠宣公時為御史中丞以私書勉公應召都堂移江西行省令有司敦請

復董中丞

書

六年壬寅

八月壬戌戒行十月丁亥至京師

春有司奉旨朝命趣行督迫邑里具

驛舟敦遣至京師已有代矣公即欲歸河凍不可行元文獻公朝夕奉公尤謹大夫士多來問學及行元

公為詩序

七年癸卯

春治歸五月己酉至揚州

董忠宣公言應奉翰林文
字吳激天稟高特道業安

成不求用於時隱居五十餘載至元間遣使求賢同
至者俱為按察本官力以母老辭還大德三年舉本

官有道之士都省奏充前職咨行省特遣之任未至而吏部作不赴任闕頃於本官無所加損似失朝廷崇儒重道之意至揚州江北淮東道肅政廉訪使趙公完澤以暑熾強公留郡學中山王玠河南張恒皆受業

答張恒問孝經七月至真州

淮東宣慰使沙卜珠公玠工部侍郎

賈公鈞湖廣廉訪使盧公摯淮東僉事趙公瑛南臺御史詹公士龍及元文敏公諸寓公具疏致幣率子弟至揚州請公講學

八年甲辰

授將仕郎江西等處儒學副提舉十月還家

九年乙巳

較定邵子

公嘗謂邵子著書一本於易直可上接羲文周孔之傳非術數之比其能前知在人

不在書在心不在數也公天資高明蚤年已能領悟故於其書考較詳審布置精密並有意義較定

葬書

十年丙午

四月如袁州

公將遊南嶽至袁州儒學提舉鄭公陶孫遣使致書追請赴任

十月朔

上官

各路學官循常例具禮物致慶者卻之惟諭之以篤意教養而已有直學以錢穀計其教授者

公曰直學所竊教授有所不知教授所得直學無不知者均謂之盜欺人不知而愬其可知者可乎直學為教授屬於義為犯上當先治之時天寒其人惶愧汗下拜謝悔過告訐者為之息學官之不嚴者聞之

皆凜然知耻云省若憲以兩提舉俱碩學鴻儒每加
優禮憲府即郡庠設燕以聽講為請鄭公以講席遜
公公亦以其出於誠意毋謙也為講孟子一章開發
明辨有以各當其心也日與鄭提舉謁叅政戎公益
公曰東南士習凋敝得二先生作而新之使不習如
某者得以蒙成而逄責豈非幸歟公從容言曰必欲
作成人才在於教人言忠
信行篤敬以尊德性而已

十一年丁未

正月戊辰以疾謁告二月就醫富州

寓清都觀五旬之內本司遣學

職催請者六吏人催請者四文移往復凡數十又移
省憲趣還公固辭以疾嘗曰學校教育各有其職錢
穀出入總之有司提舉之官本較定老子莊子太玄
為虛設徒糜廩粟故勇於去職

章句

公以老莊二子世之異書讀者不人人知其本旨注釋者又多荒唐自詡公為之叅考訂定將

使智之過高者不至陷溺於其中凡下者不至妄加
假度於高虛云耳太玄之書其文艱深讀之者少然
即子於其數
實有取焉
六月如臨江路
病至百日止門
人清江皮潛家
十月還

家

至大元年戊申

元武
宗朝

授從仕郎國子監丞九月改築宅於咸口

此故宅基
華蓋臨川

二山南北對峙相距各十有五
里山水明秀長子文董其役

二年己酉

正月丁未次子袞卒

袞字士工生至元壬午七月已卯既殯郡縣與都堂移江西行

省遣官禮請給驛舟具禮敦達公哀痛未欲行督趣不置

三月戒行五月至京六

月上官

初許文正公為國子祭酒始以朱子之書訓授諸生厥後監官不復身任教事唯委之博

士助教公至官六館翕然歸向公清晨舉燭堂上各舉所疑以質問日昃退就寓舍則執經以從公因其

才質之高下而開導誘掖之講論不倦每至夜分寒暑不廢一時觀感而興起者甚衆時未設典簿廩膳出內監丞主之公會其羨餘以增養膳而舊弊悉革中書省政多循習故常好大喜功東問而起立尚書省以奪其政權其丞轄嘗通洪範易經之義近進者多言儒術以迎合之數欲引公以為之重公嚴重不可屈致有辨士自謂能致之踵門曰先生負治平之學生民之塗炭國家之困敝甚矣今在朝廷寧能不

一 副執政者之求乎公以疾辭明日又至則避之辨
士遂知終不可致歸始其人老儒未嘗騎乘墮馬折
臂不能來
矣乃止

三年庚戌

四年辛亥

授文林郎國子司業癸酉上官

尚書省臣伏誅阿附
得進者皆斥罷中書

省奏升公司業劉公賡繇侍御史拜集賢學士兼國
子祭酒問語諸生曰朝廷徒以吾舊臣故自臺臣來
領學事主上作新斯文之意甚重吾豈敢當司業大
儒吾猶有所質問時不可失師不易遇諸生其勉之
公為取程淳公學校奏疏胡文公二學教法及朱文
公貢舉私議三者斟酌去取一曰經學易詩書儀禮

周禮禮記大戴記附春秋三傳附右諸經各專一經
並須熟讀經文傍通諸家講說義理度數明白分曉
凡治經者要兼通小學書及四書二曰行實孝於父
母弟在家弟於兄在外弟於長睦和於宗族姍和於
外姓之親任厚於朋友恤仁於鄉里以及衆人三曰
文藝古文詩四曰治事選舉食貨禮儀樂律算法吏
文星厯水利各於所習讀通典刑統彙經諸書是為
擬定教法同列欲改課為試行大學積分法公謂教
之以爭非良法也論
議不合遂有去志

皇慶元年壬子

元仁宗

正月移疾去職

公登舟賦詩留別僚友皆為之驚愕
諸生一旦失所依歸有流涕者監學

命屬吏及諸生十人追至通州河上
懇留不從都堂亦遣使請或尼不行
三月至真州學

者強留
講學

七月至建康冬還家

二年癸丑

集賢院知公之教人不倦同至都堂請以國子祭酒
召公還朝平章李公孟為倡言曰吳司業高年養病
而歸今即召還是
苦之也遂不復召

延祐元年甲寅

元仁宗

作久大堂

命長子文董其役倣古
規制趙文敏公篆額

八月江西貢院考

鄉試

屢以病
辭不獲

二年乙卯

正月如龍興

時經理田糧限期嚴迫使者立法苛刻務重增民賦以覲爵賞即縣奉行尤虐

民不堪命羣情洶洶邑父老知公與部使杜顯祖在朝廷有交承之誼請往陳其害公既行一日使者已趨袁瑞不及入城而還

三年丙辰

留宜黃縣五峯

公欲著易纂言五峯備舍僻靜門人往從者二十餘人

四年丁巳

七月江西省考鄉試

時患足瘡堅卧不出使者率即縣留山中不去不獲已而行考

官七員公所命題出經問曰孟子道性善堯舜至於途人一耳而論語曰性相近何也同官或恠其易公

曰於此有真知則言不差江西貢士二十二人公以
為答此問不差者纔得二三卷耳先是臣僚數言公
姓名於上前八月上特問公何在太保楚蘇對臣聞
居江西集賢知上意所在請以代李源道為直學士
中書奏可命修撰
虞集給驛聘召

五年戊午

還自永豐縣武城書院授集賢學士奉議大夫

既拜命疾

作久之無行意虞集曰此除實出上意宜勉為行

五月戒行八月次儀真

復疾

作使者亟欲復命公因辭謝遂留淮南

十一月留建康書纂言成

六月己未

留建康十月留江州

寓瀟溪書院南北學者百餘人十一月庚寅祭周元公墓

七年庚申

留江州七月湖廣省請考鄉試

以疾辭

還家

北方學者皆從

至治元年辛酉

元英宗朝

二年壬戌

如建康

定王氏義塾規制有司上其事賜額江東書院

十月還家易纂言成

三年癸亥

授翰林學士太中大夫知制誥同修國史

英宗皇帝嚴明果斷

獨委丞相拜珠以政於是勵精求治故老薦公才德於今為儒士冠故超授是命達直省舍人劉布呼齊給驛聘召疾馳至公家且曰上固知先生年已高所以來召者必欲見先生宜毋以此為辭 二月

庚寅戒行三月甲辰次龍興已酉省憲五月至京師

時上在上都丞相間公至大喜 六月己巳上官七月勅撰金書佛經

序時書經於慶壽寺中書左丞蘇蘇傳旨撰序仍諭上意一追薦列聖一祈天永命一為民祈福對曰

主上寫經之意為國為民甚盛舉也唯追薦冥福臣所未知蓋釋氏因果利益之說人所喜聞至言輪迴之事彼之高者且不談其意以為為善之人死則上通高明其極品則與日月齊光為惡之人死則下淪污穢其極下則與沙蟲同類其徒遂為超生薦拔之說以盡惑世人今列聖之神上同日月何待子孫薦

拔且國初以來凡寫經追薦之事不知其幾若超拔未效是無佛法矣若超拔已效是誣其祖矣誤為文辭不可以示後世左丞曰上命也先生請俟駕還奏之會上崩不及奏而止八月丁卯上

還次南坡崩丞相亦遇害十一月晉王入即位十二月癸

酉逆賊以次伏誅公亟謀治歸河凍不可行勅譔國子監崇文閣

碑

泰定元年甲子元泰定帝

正月推登極恩賜銀百兩金織文錦四疋二月開經筵用江浙省左丞趙簡

言也命公同中書平章張珪與祭酒鄒文原為講官壬午會議進講事宜條奏

勅講官賜坐三月壬寅上御明仁殿聽講

悉屏侍臣唯丞相御

史大夫在侍講罷命內饗賜食

甲寅上御流杯池亭聽講

公講中庸舜其大孝

章及資治通鑑數條上大悅

四月壬戌中書集議太廟神主

先是至治

末有詔作太廟議者習見同堂異室之制新廟作十二室未及遷奉而國有大故有司疑於昭穆之次故命集議焉先生曰世祖皇帝混一天下率考古制而行之古者天子七廟廟各為宮太祖廟居中左三廟為昭右三廟為穆昭穆神主各以次遞遷其廟之中頗如今中書省六部對列省部之設亦效金宋之典官府尚從前代典故豈有宗廟之序次不考古之典故可乎

七月修英宗皇帝實

錄中書會議司天監屬訐其官長

所訐二月皇后出殯係犯復日又葬

日正犯聖算行年輕侮不敬致二后同日而崩刑部取罪狀中書奏兩院會議公曰云云

二年乙丑

正月朔

以疾不能會朝

辛卯移疾

養疾南城天寶宮之別館

辛丑中書遣

官問疾

朝中知公將南歸

庚戌中書請議事

直省舍人某來

辛卯中

書具燕

禮部郎中楚輝致

閏月辛未翰林國史院開

局纂修英宗皇帝實錄

有旨賜宴丞相親至公以是居院之西廳

二月進

講八月辛亥移疾

實錄既畢

丙子中書具燕舉留

左丞相許師敬

領官屬至院燕畢即命小車出城僚友及朝士大夫知者追錢於都門外諸生送至通州中書聞知亟命

官具驛舟追至楊村不及而還十一月至龍興延祐經理各省田糧後有詔蠲虛增之稅

惟江西舞文之吏以減削則例為名增稅至三萬餘石不得免至治初包銀令為害甚定改元中書集議便民之事公力以二事為言下詔始免包銀且命體履減削之名而蠲之有司因循未行至是值奉使宣撫在江西公又言之乃督憲司即為除害人皆德之十二月還家

三年丙寅

授翰林學士資善大夫知制誥同修國史公既歸亟相數欲召

還或曰公以高年稱疾而去其可得而復致乎丞相乃言於上曰江南吳某舊德重望往年召為學士商議政事進講經筵今年高辭朝而去宜加優禮以宣揚朝廷敬老尊賢之意使天下有所激勸而聖明

之譽亦得垂於無窮矣上深然之乃有是命并賜中
統鈔五千貫金織文幣二表襲造翰林編修官劉光
至家三月己巳拜命公上表
辭謝
蔡國公張珪薦章其畧

承明詔辟啟經筵考論前經講明正道實國家之令
典其所關係非細務也而珪以家世之舊愚慙之誠
脩位宰相首當勸諫及解機務仍俾專官自念世備
戎行所謂明經實慚寡陋況通譯之難請明有限積
誠未至不能感格惟願老成之進庶幾陳聞之心竊
以周尚父授丹書之戒漢申公赴蒲輪之招皆以耆
順為國羽翼益有乞言之禮必於養老之時非徒外
飾虛文實以諮詢治道翰林學士吳激心正而量遠
氣冲而神和博考於事物之曠而達乎聖賢之蘊致
察於踐履之微而極乎神化之妙正學真傳深造自
得實與末俗盜名欺世者霄壤不同粵自布衣一再
收召超擢學士有識君子不以為過前當講說剴切

溫潤完厚康健聰明經學之師當代寡二雖蒙恩賜
存撫為禮甚優然合召還資其學問良非小補云云
未幾復舉以自代曰制誥國史二事所以成一王之
大經萬世之昭憲比於效一官分一職重輕不侔若
止因循冒昧常人孰不可為當職世從軍旅歷職省
臺文章本非所長志慮耗於勞勩深思遠責其在薦
賢翰林學士吳激學貫天人行足師表書事得筆削
之法代言近典誥之文益其所造甚深文學亦其餘
事目今兩朝實錄未經進呈累朝嘉言善行多合記
錄載事修辭全資學識又有遼金宋史先朝累有聖
旨纂修曠日引年未覩成致使前代之得失無聞聖
朝之著述不見恐貽後悔君子耻之然非博洽明通
孰克成此本官雖曰年近八十其實耳聰目明心清
力瞻今不使身任其事後必追悔無及近蒙朝廷差
官優賜存問禮意誠厚然須使當承旨之任總
裁方可成就所合舉以自代允協輿論云云

答田

憲副問

四年丁卯

三月省墓樂安縣

七世祖妣張氏夫人葬天授鄉之櫟步

留清江縣

荆襄

來學者十有五人

八月還家

天厯元年

是年初改致和元年歲在戊辰

二年己巳

七月江西省請考鄉試

辭疾不起

易纂言外翼成

至順元年庚午

天厯至順皆元文宗朝

伯子文以廕授官

先是郡縣以公歸老無復出意舉文承廕授未幾大夫同知郴州路

總管府事

叔子京以侍養授官

故事儒臣告老許官一子侍養

答王參政

問

二年辛未

答危素問八月冢婦魯氏卒

制大功服

十一月孫奮卒

居母

喪毀瘠卒公惜其穎敏哭之痛

三年壬申

此後為順帝初年先沒又三十六年元亡

留郡學

子京迎養公服所製玄冠玄端以謁先聖先師

禮記纂言成

元統元年癸酉

遷母夫人游氏於里之魯步東邊祔父左丞公墓左

六月甲子感暑得疾

公感疾服藥數日小愈踰旬頗安醫者請退公曰吾往時病退

體即清和今證已去而體氣若在病中時殆未愈也庚辰復作辛巳公命孫當曰吾疾異於常時矣召學

者魯仁曰生死常事可須使吾子孫知之共手胸前正卧不動者數日乙酉揮藥不進嗽水畢瞑目不語

里中人是夕見一大星隕於屋之東北隅

丙戌薨年八十有五

卒時神思泰然而逝

戊子小殮襲用玄端已丑大殮用絞衿

事聞詔加贈資德大夫江西等

處行中書省左丞上護軍追封臨川郡公謚曰文正

謚法經天緯地曰
文內外賓服曰正

行狀

曾祖大德妣張氏祖鐸贈中奉大夫淮東道宣慰使護
軍追封臨川郡公妣謝氏追封臨川郡夫人考樞贈資
善大夫湖廣等處行中書省左丞上護軍追封臨川郡
公妣游氏追封臨川郡夫人先生諱澄字幼清晚稱伯
清姓吳氏其先自豫章之豐城遷居崇仁七世祖周生
二子璣將鄉兵留太平州璿生曄始居咸口里公之高

祖矣自是以來世治進士業先生以宋淳祐九年己酉
正月十有九日生前一夕鄉父老見有異氣降其家後
有望氣者言華蓋臨川兩山之間當有異人出兩山之
間所謂咸口里也三歲穎異日發宣慰公抱置膝上教
之古詩隨口成誦五歲就外傳日受千餘言誦之數過
即記不忘母夫人憂其過勤夜節膏油之焚常候母寢
復續火讀書達旦不敢令母氏知也七歲論語孟子五
經皆成誦能著律賦九歲鄉邑課試每中前列十歲始

得朱子大學等書而讀之恍然知為學之要日誦大學
二十過如是者三年次第讀論語孟子中庸專勤亦如
之晝誦夜惟弗達弗措十三歲大肆力於羣書家貧常
從鬻書者借讀既而還之鬻書者曰子晝讀之乎先生
曰試舉以問我鬻者每問一篇輒終其卷鬻者遂獻其
書十四歲卅角赴郡學補試郡之前輩儒者皆驚其文
十五歲知厭科舉之業而用力聖賢之學見朱子訓子
帖有勤謹二字如得面命而服行之作勤謹二箴又作

敬銘有曰把捉於中精神心術檢束於外形骸肌骨又作和銘極言周子程伯子氣象以自勉常自言曰讀敬銘如臨嚴師如在靈祠百妄俱消不覺足之重手之恭讀和銘心神怡曠萬境俱融熙熙然不知手之舞足之蹈也其後又作顏丹銘理一箴自新銘自修銘消人欲銘長天理銘克己銘悔過銘矯輕銘警惰銘等節節警策踐履之功於斯可見矣是歲宣慰公赴鄉試先生侍行時郡守迎新安徽菴程先生若庸以朱子之學教授

郡之臨汝書院徽菴蓋從雙峰饒氏游先生因鄉人謁之徽菴未出而外齋有揭帖片紙滿壁皆徽菴特見以語學者之說先生一覽而盡之及見先生從容進問曰如先生壁間之書以大學為高明正大之學然則小學乃卑小淺陋之學乎若此者數條徽菴曰吾處此久矣未有如子能問者吾有子曰仔復族子頤之與子年相若可同學為友頤之者盱江程文憲公文海鉅夫舊名也自是常往來徽菴之門徽菴深知之而同堂之人弗

盡知也咸淳元年冬左丞公侍宣慰公之疾久而小間
宣慰公謂左丞曰吾察此孫晝夜服勤連月不懈而精
神有餘此大器也可善教之蓋宣慰自襁褓知愛先生
間形於言而親戚鄉里以為有譽孫之癖矣十有二月
宣慰公捐館喪葬凡役先生考古禮稟於左丞而行之
十九歲著說曰道之大原出於天聖神繼之堯舜而上
道之元也堯舜而下其亨也洙泗魯鄒其利也濂洛關
閩其貞也分而言之上古則羲皇其元堯舜其亨乎禹

湯其利文武周公其貞乎中古之統仲尼其元顏曾其
亨子思其利孟子其貞乎近古之統周子其元也程張
其亨也朱子其利也孰謂今日之貞乎未之有也然則
可以終無所歸哉蓋有不可得而辭者矣又嘗與人書
曰天生豪傑之士不數也夫所謂豪傑之士度越一世
而超出等夷也戰國之時孔子徒黨盡矣充塞仁義若
楊墨之徒又滔滔也而孟子生乎其時獨願學孔子而
卒其傳當斯時也曠古一人而已真豪傑之士哉孟子

沒千有餘年溺於俗儒之陋習淫於老佛之異教無一
豪傑之士生於其間至於周程張邵一時迭出非豪傑
其孰能與於斯乎又百年而朱子集數子之大成則中
興之豪傑也以紹朱子之統自任者果有其人乎澄之
韶齋時惟大父家庭之訓是聞以時文見知於人未聞
道也及知聖賢之學而未知能學也於是以豪傑自期
以進於聖賢之學而又欲推之以堯舜其君民而後已
實用其力於斯豁然似有所見坦然知其易行而力小

任重固未敢自以為是而自料所見愈於人矣是時先生方弱冠而有志自任如此其後先生嘗識此二文之後曰其見多未定之見其言多有病之言然不忍棄去錄而藏之則晚年所進自此可攷矣六年庚午應撫州鄉舉以第二十八名薦明年試禮部下第歸而纂次舊作謂之私錄時宋亡之證已見先生以其道教授鄉里嘗作草屋數間而題其牖曰抱膝梁父吟浩歌出師表程文憲公知其意題之曰草廬學者稱之曰草廬先生歲

乙亥皇元至元十二歲也撫州內附傳檄樂安樂安丞
蜀人黃酉卿不署狀去之窮谷不免寒餓猶招先生教
其子先生從之十四年亡宋丞相文天祥起兵廬陵郡
多應之傍近冠起先生奉親避地弗寧厥居鄉貢進士
鄭松奇士也迎先生隱居布水谷後人以其處為真隱
觀十八年纂次諸經註釋孝經章句咸十九年較定易
書詩春秋修正儀禮小戴大戴記二十年自布水還居
草廬二十一年五月左丞公捐館二十三年程文憲公

奉詔起遺逸於江南至撫州強起先生以母老辭程公
曰不欲仕可也燕冀中原可無一觀乎母夫人喜其行
與程公同如京師既至程公猶薦先生不令其知先生
覺其意力以母老辭二十四年歸朝廷老成及宋之遺
士在者皆感激賦詩餞之故宋宗室趙文敏公孟頫方
召為兵部郎官獨書朱子與劉屏山所和詩三章以遺
之一時風致識者歎之二十五年程文憲公言於朝曰
吳澄不願仕而所定易書詩春秋儀禮大小戴記得聖

賢之旨可以教國子傳之天下有旨江西行省遣官繕錄以進郡縣以時敷禮元貞元年八月遊豫章西山憲幕長郝文仲明迎先生入城學易時南北學者日衆清河元文敏公明善時行省掾以文學自負常屈其坐人見先生問春秋大義數十條皆領會至語之理學有所未契先生使讀程氏遺書近思錄文敏素讀是書至是始知反覆玩味他日見先生曰先生之學程子之學也願為弟子授業終其身城中居官之人及諸生皆願聞

先生一言請先生至郡學先生為說修己以敬一章指畫口授反覆萬餘言聽者千百人有常用力於斯者多所感發三年董忠宣公士選任江西行省左丞因文敏得見先生於館塾以為平生所見士未有德容辭氣援據經傳如先生者大德元年拜行臺御史中丞入奏事首以先生為薦及在樞府又薦之一日議事中書起立謂丞相曰士選所薦吳澄經明行修大受之罷論道經邦可助治國平章軍國重事博果密曰樞密質實所薦

天下士也丞相逮事世祖親見用人之道平章許文正公高弟之得其傳者是以知董忠宣之言授應奉翰林文字登仕佐郎同知制誥兼國史院編修官詔有司敦遣忠宣又以手書招之先生答書云朝廷用人之不次公卿薦人之不私布衣之授特知蒙特恩如此近世以來所希有也雖木石猶當思所以報稱而況於人乎然夫子勸漆雕開仕對以吾斯之未能信而夫子說之者深以開之可仕不可仕開知之而夫子未知之也閤下之

舉古大臣之事澄敢不以古賢人之所以自處者自勉
繼以邵子之詩曰幸逢堯舜為真主且放巢由作外臣
澄雖不敏願自附於前賢成之者在閣下矣有司敦迫
久之先生為一至京師而代者上矣方冬寒沍京師學
者奉先生而問學焉七年春中丞猶抗章論朝廷失待
士之禮先生歸至揚州時憲使趙公弘道及寓公珊竹
公玠盧公摯賈公鈞趙公英詹公士龍元公明善等先
後留先生身率子弟諸生受業明年八月除將仕郎江

西等處儒學副提舉九月校定邵子之書十年十月之
官十一年正月朔以疾辭去留清都觀與門人論及老
子莊子太玄等書之本旨因証其訛偽而著其說至大
元年除從仕郎國子丞朝命行省敦遣二年六月到官
先是世祖皇帝初命許文正公自中書出為祭酒文正
始以所得朱子小學躬尊信之以訓授弟子繼之者多
其門人猶能守其法久而寢失其舊先生既至深憫學
者之日就乎荒唐而徒從事於利誘也思有以作新之

於是六館諸生知所趨向先生旦秉燭堂上諸生以次授業晝趨堂後寓舍則執經者隨而請問先生懇懇循循其言明白痛切因其才質之高下聞見之淺深而開導誘掖之使其刻意研窮以究精微之蘊反身克治以踐乎進脩之實講論不倦每至夜分寒暑不廢於是一時遊觀之彥雖不列在弟子員者亦皆有所觀感而興起矣時朝廷循習寬厚好功名者奏立尚書省改更紛然新執政鑄錢貨變鈔法以為功欲得先生助已而恐

其不可致有士請致先生先生卧病門生家不可致乃
歸給其人曰老儒不善騎墮馬折臂矣四年武皇賓天
仁宗即位尚書省罷先生陞司業侍御史劉公賡拜集
賢學士兼國子祭酒召諸生語之曰朝廷徒以吾舊人自
臺臣遷以重國學司業大儒吾猶有所質問師不易得
時不可失諸生勉之皇慶元年正月先生買舟通州既
行而後移文告其去監學官愕然貴游之士張張失所
依有流涕者數十人追至河上懇留不從朝廷亦遣人

追留或尼不行蓋先生嘗為學者言朱子道問學工夫多
陸子靜却以尊德性為主問學不本於德性則其弊偏
於語言訓釋之末果如陸子靜所言矣今學者當以尊
德性為本庶幾得之議者遂以先生為陸學非許氏尊
信朱子之義然為之辭耳初亦莫知朱陸之為何如也
延祐三年先生深入宜黃山中五峯僧舍以居六越月
修易纂言四年江西行省請考鄉試先生出經問曰孟
子道性善堯舜至於塗人一耳而論語曰性相近何也

同官或怪其易先生曰於此有真知則言不差江西貢士二十二人而答此問不差者先生以為纔得三四卷耳五年春除集賢直學士特陞奉議大夫遣集賢脩撰虞集奉詔召先生於家行至儀真病作不復行渡江謁金陵門人王進德家新書塾所至學者雲集居數月修書纂言六年十月泝江州寓濂溪書院十一月率諸生拜周元公之墓是年北方學者為多明年還臨川從之者皆北人至治二年易纂言成三年英宗即位東平王

拜珠為丞相勵精為治黜陟臧否朝廷赫然超拜先生為翰林學士知制誥同脩國史階太中大夫遣直省舍人劉布呼奚奉詔召先生於家使者致君相之意甚篤先生拜命即行五月至京師六月入院時詔學士散直集善書者粉黃金寫浮圖藏經有旨自上都來使丞相蘇蘇詔先生為之序先生曰主上寫經之意為國為民甚重事也但追薦冥福臣所未知蓋釋氏因果利益之說人所喜聞至言輪迴之事彼之高者且不談其意止

謂為善之人死則上通高明其極品則與日月齊光為
惡之人死則下淪污穢其極下則與沙蟲同類其徒遂
為超生薦拔之說以蠱惑世人今列聖之神上同日月
何待子孫薦拔且國初以來凡寫經追薦之事不知其
幾若超拔未効是無佛法矣若超拔已効是誣其祖矣
誤為文辭不可以示後世左丞曰上命也先生請俟駕
還奏之會上崩不及奏而止泰定元年朝廷用江浙行
省左丞趙簡言開經筵進講平章蔡國張公珪領之以

經學屬之先生先生言溫而氣和經旨敷暢得古人勸
講之體廷中驟見文物之盛而先生首當其任來者法
焉在至治末詔作太廟議者習見同堂異室之制新廟
作十二室未及遷奉而國有大故有司疑於昭穆之次
故命集議焉先生曰世祖皇帝混一天下率攷古制而
行之古者天子七廟廟各為宮太祖廟居中左三廟為
昭右三廟為穆昭穆神主各以次遞遷其廟之中頗如
今中書省六部對列省部之設亦倣金宋之典官府尚

從前代典故豈有宗廟之叙次而不攷古之典故可乎
七月有旨國史院脩英宗實錄時漢人承旨缺先生總
其事分局纂修既畢先生有歸志中書左丞奉旨賜宴
史院致勉留之意宴畢命小車出城朝士追送於齊化
門外諸生送至通州中書聞亟命官具驛舟追至楊村
不及而還是年先生七十有七歲十一月至豫章延祐
經理民田時激變贛之寧都中外騷動事定詔蠲虛增
之稅惟江西有郡縣舞文之吏以減削則例為名增稅

三萬餘石者不得免至治初又行包銀為害益甚先生
在朝數言于執政者泰定改元中書會議便民之事先
生始以二事為言詔書始免包銀且命體覆減削之名
而蠲除其稅有司因循未行至是值宣撫在江西其副
齊公履謙嘗與同官成均相敬如師友先生力以告之
乃督憲司即為除豁十二月抵家中書言吳澄國之名
儒朝之舊德年高而歸不忍重勞之宜有所褒異有詔
加授資善大夫賜鈔五千貫金織文錦二皆有副初先

生與張蔡公同年告老其再相也力荐起先生會蔡公
又去而士大夫多傳其辭云欽承明詔肇起經筵考論
前經講明正道實國家之令典其所關係非細務也而
珪以家世之舊愚慙之誠備位宰臣首當勸講及解機
務仍俾專官自念世備戎行所謂明經實慚寡陋况通
譯之難講明有限積誠未至不能感格惟願老成之進
庶幾陳閉之心切以周尚父授丹書之戒漢申公赴蒲
輪之招皆以期頤為國羽翼蓋有乞言之禮必於養老

之時非徒外飾虛文實以諮詢治道翰林學士吳澄心
正而量遠氣充而神和博考於事物之曠而達乎聖賢
之蘊致察於踐履之微而極乎神化之妙正學真傳深
造自得實與末俗盜名欺世者霄壤不同粵自布衣一
再收召超擢學士有識君子不以為過前當講明剴切
溫潤完厚康健聰明經學之師當代寡二雖蒙恩賜存
撫為禮甚優然合召還資其學問良非小補未幾復舉
以自代曰制誥國史二事所以成一王之大經為萬世

之昭憲比于效一官分一職者重輕不侔若止因循冒昧常人孰不可為當職世從軍旅歷仕省臺文章本非所長志慮耗於勞勩深思遠責其在荐賢翰林學士吳澄學通天人行足師表書事得筆削之法代言近典誥之文蓋其所造甚深文學亦其餘事目今兩朝實錄未經呈進累朝嘉言善行多合紀錄載事修辭全資學識又有遼金宋史先朝累有聖旨纂修曠日引年未覩成效使前代之得失無聞聖朝之著述不見恐貽後悔君

子耻之然非博洽明通孰克成此本官雖曰年近八十
其實耳聰目明心清力贍今不使身任其事後必追悔
無及近蒙朝廷差官優賜存問禮意誠厚然後使當承
旨之任總裁方可成就所合舉以自代允協輿論天厯
元年春秋纂言成二年易纂言外翼成遊先生之門南
北之士前後無慮千百人門人元明善言嘗聞先生論
及門之士先生慨然曰吾聞郡多俊秀宜有可望者三
年其第三子京為撫州路儒學教授迎先生至城府學

者無不得見焉進而教之靡間晨夕雖偶病少間未嘗
輟其問答居久之則又問明善曰得毋有未見者乎後
數日部使者郡守請先生觀新旌樓先生賦詩一章懷
王丞相陸子靜以示學者遂登車歸其鄉矣四年禮記
纂言成六月先生寢疾病踰旬屏藥醫使門人告子孫
治後事拱手正身而卧乙酉夜有大星隕其舍東北隅
丙戌日正午神氣泰然而薨年八十有五歲以玄端歛
娶余氏追封臨川郡夫人子男五文廕奉議大夫同知

柳州路總管府事後先生一年卒袞先卒京以奉養先生特授撫州路儒學教授稟置孫男十一當蕃畲當營奮里畀畧畧畲當世孫女五適譚觀曾文熊鈴袁鎮黃盡曾孫男四全全俞女二嗚呼孟子歿千五百年而周子出河南兩程子為得其傳時則有若張子精思以致其道其迥出千古則又有邵子焉邵子之學既無傳而張子歿門人往往卒業於程氏程門學者篤信師說各有所奮力以張皇斯道奈何世運衰微民生寡

祐而亂亡隨之矣悲夫斯道之南豫章延平高明純潔
又得朱子而屬之百有餘年間師弟子之言折衷無復
遺憾求之於書蓋所謂集大成者時則有若陸子靜氏
超然有得於孟子先立乎其大者之旨其於斯文互有
發明學者於焉可以見其全體大用之盛而二家門人
區區異同相勝之淺見蓋無足論也朱子以來又將百
年為其學者毫分縷析日以增盛曾不足少救俗學利
欲之禍而宋遂亡矣先生之生炎運垂息自其齠齔特

異常人得斷簡於衆遺發新知於卓識盛年英邁自任以天下斯文之重蓋不可禦也摧折窮困壯志莫遂艱難避地垂十數年其所以致於聖賢之道者日就月將矣歷觀近代進學之勇其孰能過之南北未一許文正公先得朱子之書於邊境伏讀而深信之持其說以事世祖皇帝而儒者之道不廢許公實啟之是以世祖以來不愛名爵以起天下之處士雖所學所造各有以自見其質諸聖賢而不悖俟乎百世而不惑論者尚慎然也

先生自布衣用大臣薦出處久遠道義以之三命益隆遽至內相之貴稽其立朝之日未嘗有三年淹也施教成均師道尊重勸講內廷誠意深遠與大議論大事雖可驟見而無悠久浹洽之功者非人之所能為也然而先生生八十有五年耳聰目明以終其身得以其學肆於聖經賢傳以辨前儒之惑以成一家之言天下後世之學者可以探索玩味於無窮矣其於易學之五十餘年其大旨宗乎周邵而義理則本諸程傳其校定用東

萊呂氏之本而修正其缺衍繆誤其纂言則纂古人今人之言有合於已之所自得者大槩因朱子象占之說而益廣其精微若項安世玩辭等說則因之益致其潔靜至於自得之妙有非學者所能遽知而通其類例以求之者則在外翼外翼十二篇曰卦統曰卦對曰卦變曰卦主曰變卦曰互卦曰象例曰占例曰辭例曰變例曰易原曰易派書校定以伏生所傳自為一卷不以所謂古文者雜之春秋纂言蓋取近代儒者特見之明以

破往昔諸家傳註穿鑿之陋決以己意而折衷之使人
知聖筆有一代之法而是經無不通之例既採撫羣言
各麗於經又用趙氏纂例之法分所異合所同纂為總
例七篇曰天道曰人紀曰嘉禮曰賓禮曰軍禮曰凶禮
曰吉禮例之綱七例之目八十有八凡春秋之例禮失
者書出於禮則入於法故曰刑書也事實辭文善惡畢
見聖人何容心哉蓋渾渾如天道焉所謂例學者以此
而求聖經云耳儀禮存者十七篇先生補逸經八篇者

投壺奔喪取之小戴記公冠諸侯遷廟諸侯釁廟取之
大戴記中雷禘於太廟王居明堂諸篇名見鄭氏注而其
文則甚畧矣有傳十篇冠義昏義士相見義鄉飲酒義
鄉射義燕義大射義皆取之小戴記大射義乃自鄉射
義而分者聘義公食大夫義則用清江劉氏所補朝事
義則取諸大戴記以備觀義而所謂禮記纂言者既取
諸義附於經又別大學中庸別為一書其存者凡三十
六篇通禮九喪禮十一祭禮四通論十二篇次先後稍變

於舊就篇之中科分櫛剔以類相從俾其上下文意聯
屬章之大旨標識於左其篇章文句秩然有倫先後始
終至為精密先王之遺制聖賢之格言千有餘年其亡
闕僅存而可攷者既表而出之各有所附而其糾紛固
泥於專門名家之手者一旦各有條理無復餘蘊矣孝
經章句最所蚤定而外傳十卷亡矣其餘皆存也詩則
以為朱氏傳得其七八其有餘論則門人傳其言未及
集錄周子程子之書既定於朱子之手而張子邵子之

書先生始為校定次第正其訛缺張子書挈東西銘於篇首而正蒙次之又以邵子為孔子以來一人而已蓋其於邵子之學深有所會悟也先生之博通妙契有未易言者門人衆多浩不可遏各以其所欲而求之各以其所能而受之蓋不齊也乃著學基一篇使知德性之當尊著學統一篇使知問學之當道所謂窮鄉晚進無良師友而有志於學者循此而學之庶乎其不差矣又有老子莊子太玄經樂律八陣圖郭璞葬書等說卓見

精識去世俗淺陋之說遠甚而先生支餘之學蓋不止此其進學之塗轍首見於私錄二卷而心術之精微文集具可考見平日議論門人各有紀述識者有所擇焉嗚呼先生往矣其可得而見者經學文字之傳於世者也至若厲如秋霜煦若春日論說如江河之淵源沾溉若雨雲之敷布親切者如劍之就礪薰陶者如飲之得醇望之而心服即之而氣融比之求於言語文字之微者其感化疾矣不幸天不憖遺文星下墜後死者不得

有與於聲光然而自昔賢者所可見於後世者亦賴此而已矣嗚呼天乎集之先君子長先生四歲有交友之誼自幼侍側以聆其緒餘晚仕於朝嘗從先生之後歸田之日先生已去世數月益深嘆其有不可得聞者竊叙所知之萬一以告方來之學者謹繕寫上之國史太常使君子有所考觀焉謹狀

列傳

吳澄字幼清撫州崇仁人高祖暕初居咸口里當華蓋

臨川二山間望氣者徐覺言其地當出異人澄生前一
夕鄉父老見異氣降其家鄰媼復夢有物蜿蜒降其舍
旁池中旦以告人而澄生三歲穎悟日發教之古詩隨
口成誦五歲日受千餘言夜讀書至旦毋憂其過勤節
膏火不多與候毋寢燃火復誦習九歲從羣弟子試鄉
校每中前列既長於經傳皆習通之知用力聖賢之學
嘗舉進士不中至元十三年民初附盜賊所在蜂起樂
安鄭松招澄居布水谷乃著孝經章句校定易書詩春

秋儀禮及大小戴記御史程鉅夫奉詔求賢江南起澄
至京師未幾以母老辭歸鉅夫請置澄所著書於國子
監以資學者朝廷命有司即其家錄上元貞初將龍興
按察司經歷郝文迎至郡學日聽講誦其問答凡數千
言行省掾元明善以文學自負嘗問澄易詩書春秋興
義歎曰與吳先生言如探淵海遂執弟子禮終其身左
丞董士選延之於家親執饋食曰吳先生天下士也既
入朝薦有道擢應奉翰林文字有司敦勸久之乃至而

代者已到官澄即日南歸未幾除江西儒學副提舉居
三月以疾去官至大元年召為國子監丞先是許文正
公衡為祭酒始以朱子小學等書授弟子久之漸失其
舊澄至旦燃燭坐堂上諸生以次受業日昃退燕居之室
執經問難者接踵而至澄各因其材質反覆訓誘之每
至夜分雖寒暑不易也皇慶元年陞司業用程純公學
校奏疏胡文定公六學教法朱文公學校貢舉私議約
之為教法四條一曰經學二曰行實三曰文藝四曰治

事未及行又嘗為學者言朱子於道問學之功居多而陸子靜以尊德性為主問學不本於德性則其弊必偏於言語訓釋之末故學必以德性為本庶幾得之議者遂以澄為陸氏之學非許氏尊信朱子本意然亦莫知朱陸之為何如也澄一夕謝去諸生有不謁告而從之南者俄拜集賢直學士特授奉議大夫俾乘驛至京師次真州疾作不果行英宗即位超遷翰林學士進階太中大夫先是有旨集善書者粉黃金為泥寫浮屠藏經

帝在上都使左丞蘇蘇詔澄為序澄曰主上寫經為民
祈福甚盛舉也若用以追薦臣所未知益福田利益人
所樂聞而輪迴之事彼習其學者猶或不言不過謂為
善之人死則上通高明其極品則與日月齊光為惡之
人死則下淪汙濁其極下則與沙蟲同類其徒遂為薦
拔之說以惑世人今列聖之神上同日月何庸薦拔且
國初以來凡寫經追薦不知幾舉若未効是無佛法矣
若已効是誣祖也撰為文辭不可以示後世擬自上還

奏之會帝崩而止泰定元年初開經筵首命澄與平章政事張珪國子祭酒鄧文原為講官在至治末詔作太廟議者習見同堂異室之制乃作十二室未及遷奉而國有大故有司疑於昭穆之次命集議之澄議曰世祖混一天下悉攷古制而行之古者天子七廟廟各為宮太祖居中左三廟為昭右三廟為穆昭穆神主各以次第遷其廟之宮頗如今之中書六部夫省部之設亦倣金宋豈以宗廟次序而不攷古乎有司急於行事竟如

舊次云時澄已有去志會脩英宗實錄命總其事居數月實錄成未上即移疾不出中書左丞許思敬奉旨賜宴國史院仍致朝廷勉留之意宴罷即出城登舟去中書聞之遣官驛追不及而還言於帝曰吳澄國之名儒朝之舊德今請老而歸不忍重勞之宜有所褒異詔加資善大夫仍以金織文綺及鈔五千貫賜之澄身若不勝衣正坐拱手氣融神邁奮問亹亹使人渙若冰釋弱冠時嘗著說曰道之大原出於天神聖繼之堯舜而上

道之元也堯舜而下其亨也洙泗魯鄒其利也濂洛關
閩其貞也分而言之上古則羲皇其元堯舜其亨禹湯
其利文武周公其貞乎中古之統仲尼其元顏魯其亨
乎子思孟子其貞近古之統周子其元程張其亨也朱
子其利也孰為今日之貞乎未之有也然則可以終無
所歸哉其蚤以斯文自任如此故出登朝署歸於家與
郡邑之所經由士大夫皆迎請執業而四方之士不憚
數千里躡屩負笈來學山中者常不下千數百人少暇

即著書至將終猶不置也於易書春秋禮記各有纂言
盡破傳注穿鑿以發其蘊條歸紀叙精明簡潔卓然成
一家言作學基學統二篇使人知學之本與為學之叙
尤有得於邵子之學校定皇極經世書又校定老子莊
子太玄經樂律及八陣圖郭璞葬書初澄所居草屋數
間程鉅夫題曰草廬故學者稱之為草廬先生天歷三
年朝廷以澄耆老特命次子京為撫州教授以便奉養
明年六月得疾有大星墜其舍東北澄卒年八十五贈

江西行省左丞上護軍追封臨川郡公謚文正長子文終同知柳州路總管府事京終翰林國史院典籍官孫當自有傳

壙記

有元翰林學士吳公諱澄字伯清居撫州路崇仁縣祖鐸贈中奉大夫淮東道宣慰使護軍追封臨川郡公妣謝氏追封臨川郡夫人考樞贈資善大夫湖廣等處行中書省左丞上護軍追封臨川郡公妣游氏追封臨川

郡夫人公生宋淳祐九年己酉正月十有九日中咸淳
九年鄉貢進士舉皇元大德四年以處士起授應奉翰
林文字登仕佐郎同知制誥兼國史院編修官未上八
年除將仕郎江西等處儒學副提舉至官三月以疾辭
去至大元年擢從仕郎國子監丞二年六月到官四年
就陞國子司業轉文林郎公欲更學制與僚友論不合
皇慶元年正月去官延祐五年進集賢直學士超轉奉
議大夫奉詔行至儀真病作而歸至治三年超拜翰林

學士知制誥同修國史階太中大夫奉詔遣直省舍人
特召於家五月至官秋聞南坡之變即有歸志以寒沍
舟不可行泰定元年春開經筵詔公獨當其任明年二
月有旨修英宗實錄時承旨缺公總其事八月書成即
歸三年特詔加授資善大夫賜鈔五千貫金織紋錦二
皆有副上表辭謝上不允至順四年六月丙戌薨於正
寢至正五年贈江西等處行中書省左丞上護軍封臨
川郡公謚文正子男五文袞京稟亶文奉議大夫同知

柳州路總管府事後公一歲卒京將仕佐郎翰林國史
院典籍官孫男十二當蕃當奮里界畧界疊累當翰
林脩撰徵事郎同知制誥兼國史院編脩官孫女八曾
孫男九公全公命全鈺銑鏗曾孫女七玄孫男一炫
玄孫女一以至正七年七月初九日己酉葬縣之禮賢
鄉太平里謹誌於壙云

神道碑

揭傒斯奉詔撰

皇元受命天降真儒北有許衡南有吳澄所以恢宏至

道潤色鴻業有以知斯文未喪景運方興也然金亡四
十三年宋始隨之許公居王畿之內一時用事皆金遺
老得早以聖賢之學佐聖天子開萬世無窮之基故其
用也弘吳公僻在江南居阨危之中及天下既定又二
十六年始以大臣薦強起而用之則年已五十餘矣雖
事上之日晚而得以聖賢之學為四方學者之依歸為
聖天子致明道敷教之實故其及也深上既命詞臣歐
陽玄誄許公之行於石復以吳先生之述詔臣僕斯臣

材質駕下於學問無一堪可詎足以窺涯涘塞明詔然
國家盛典敢不欽承謹按前奎章閣侍書學士虞集狀
公諱澄字伯清撫之崇仁人曾大父大德大父鐸皇贈
中奉大夫淮東宣慰使護軍追封臨川郡公父諱樞皇
贈資善大夫湖廣等處行中書省左丞上護軍追封臨
川郡公祖妣謝氏妣游氏追封臨川郡夫人世有積德
為儒家其所居咸口里在華蓋臨川二山之間豐城徐
覺者善望氣嘗過而指曰必有異人出焉已而生公之

前一夕里中人夢有神物蜿蜒降公所居明日生公三
歲能誦歌詩數百篇五歲出就外傳日受千餘言三四
過即記不忘夜誦常至達旦七歲能默誦五經十歲知
為學之本大肆力於朱子諸書猶以大學為入道之門
必日誦二十過如是者三年十五遂以聖人之學自任
作勤謹二箴敬和二銘十六拜程若庸先生友程文憲
公鉅夫十九作自新自脩消人欲長天理克己悔過矯
輕警惰諸銘以自策勵二十舉進士明年下第又三年

宋亡天下為元是為至元十三年而政教未舒民疑未
附乃與樂安鄭松隱居布水谷作孝經章句校定易書
詩春秋儀禮大小戴記二十一年遭父喪凡治喪悉從
古制鄉里皆化行之服除程文憲公以南臺侍御史奉
詔求賢江南強起公以故舊俱至京師而不受其薦居
數月以母老辭去程公既不能屈公又言所校諸書宜
置國子監以資學者朝廷下行省行省下有司即其家
盡錄上之元貞初至豫章憲幕長郝文公迎館郡庠朝

夕聽講有所問答原理數千言省屬元文敏公明善以學自命問易詩書春秋歎曰與吳先生言如探淵海終身執弟子禮董忠宣公士選時為行省左丞迎至家親執饋食曰吳先生天下士董公由南臺御史中丞入僉樞密院事薦有道東平文貞王博理密曰董公不妄舉方議行用之會遷御史中丞尋以疾薨不果用五年又以董公為中丞乃授應奉翰林文字登仕郎同知制誥國史院編修官比至已有代執手遮留不去中山王珣

張達河西張恒輩皆從受業焉八年秋除將仕郎江西
儒學副提舉明年待次家居校定邵子書始推其書上
接伏羲文王周公孔子之傳明年冬始就官居三月即
免去校定老子莊子太玄至大元年以從仕郎國子監
丞召脩許文正公之教日講於公夕講於次寒暑不懈
仁宗即位進司業乃損益程淳公學校奏疏胡文定公
大學教法朱文公學校貢舉司議為教四條一曰經學
二曰行實三曰文藝四曰治事未及施行為同列所嫉

一夕竟去六館諸生悵悵如失父母者有不謁告徙之而南者居數年然後歸歸皆取高科為名士集賢以祭酒召公中書不可延祐初賓興之詔行四年再校議江西而詔集賢修撰虞集秉傳山中起為集賢直學士特加奉議大夫明年秋行至儀真以疾謝遣使者就金陵過九江拜周元公墓而歸北方學徒數十人皆從之至家留不去英宗即位鄆忠憲王拜珠為丞相進賢屏惡天下風動至治三年春遣中書直省舍人會江西南省臣

就家起拜翰林學士知制誥同脩國史進階太中大夫
以五月至京師時駕在上都尋有南坡之變明年春治
任將歸衆皆懇留為大行實錄計會朝廷以江浙行省
左丞趙簡言請開經筵以公及平章政事張蔡公珪國
子祭酒鄧文原為講官每進講必三四過乃已泰定二
年閏月脩英宗實錄八月書成未及上進即稱疾中書
知有去志即院具宴舉留宴畢乘小車出城委牒而去
中書聞之即以驛舟追至楊村不及而返明年詔遣使

賜楮幣五千緡金織段文二進階資善大夫公上表辭
所賜物四方學者日益衆公雖疾必強起教之又衣食
之故學者多至卒業而後去元統元年六月微疾乙酉
夜有大星隕其舍東北隅明日日中遂薨年八十五以
玄端歛及治喪一用公所定家禮贈江西行省左丞上
護軍追封臨川郡公謚文正妻余氏追封臨川郡夫人
子男五文以澤授奉議大夫同知柳州路總管府事後
公一年卒褒先卒京以便養特授撫州路儒學教授稟

宣孫男十當蕃畬當畬里畧畧當國子助教畬當
早世女五譚觀曾文熊鈴黃盡其壻也曾孫男四人全
公命孫女二臣竊惟我國家自太祖皇帝至於憲宗凡
歷四朝五十餘載天下猶未一法度猶未張聖人之學
猶未明世祖皇帝以天縱之聖繼統纂業豪傑並用羣
儒四歸武定文承化被萬國何其盛歟至若真儒之用
時則有若許文正公由朱子之言聖人之學列位臺輔
施教國子是以天啟昌明之運也乃若吳公研磨六經

疏滌百氏綱明目張如禹之治水雖不獲任君之政而
著書立言師表百世又豈一材一藝所得並哉其學之
源則見於易詩書春秋禮記諸纂言其學之序則見於
學統學基諸書而深造極詣猶莫尚於邵子其所著書
文章皆行於世公隱居時有草屋數間程文憲公過而
署其牖曰草廬故號草廬先生其葬以元丁亥其墓在
縣之禮賢鄉地名左橋陳頊坑其銘曰

天地之大六籍載焉帝王之尊六籍位焉六籍之道無

內無外六籍之義有顯有晦匪伊求之道何由明匪伊
明之道何由行昔豈弗求求或未至昔豈弗明明或猶
蔽天監六籍生此哲人挾微闡幽志氣如神其言汪汪
其書洋洋其學之方其國之光天下儒師國中通貴永
配孔庭以式百世



吳文正集附錄